

永樂大典

卷一萬一百十五

之一萬一百十六

二紙
第四

os.
MS
83398

YUNG-LO TA-TIEN

[Yung-lo ta-tien. Chuan 10115-6.
Rhyme word 𠄎 of the Ming encyclopaedia
part 2. Two meanings of the character
respectively office and purport.
Chinese text. MS. c. 1560.] 83398

永樂大典卷之一萬一百十五

二紙

旨

翰林學士承旨

文獻通考唐憲宗時始置凡白麻制誥皆內庭代言命輔臣除節將恤災患討不廷

則用之宰臣於正衙受付通事舍人若命相之書則通事舍人承旨皆宣

讀訖始下有司乾寧二年陸扆以翰林學士承旨拜中書侍郎平章事職

官分紀唐百官志學士之職本以文學言語被顧問出入侍從因得參謀

議納諫諍其禮尤寵而翰林院者待詔之所也唐制乘輿所在必有文詞

經學之士下至卜醫伎術之流皆直於別院以備宴見而文書詔令則中

書舍人掌之自太宗時名儒學士時時召以草制然猶未有名號乾封以

後始號北門學士玄宗初置翰林待詔以張說陸堅張九齡等為之掌四

方表疏批荅應和文章既而又以中書務剽文書多壅滯乃選文學之士

號翰林供奉與集賢院學士分掌制詔書勅開元二十六年又改翰林供

奉為學士院專掌內命凡拜免將相號令征伐皆用白麻其後選用益重



而禮遇益親。至號為內相。又以為天子私人。凡充其職者無定員。自諸曹尚書下至校書郎皆得與選。入院一歲則遷。知制誥未知制誥者不作文書。班次各以其官。內宴則居宰相之下。一品之上。憲宗時又置學士承旨。唐之學士弘文集賢分隸中書門下省。而翰林學士獨無所屬。故附列於此云。李肇翰林志。昔宋昌有言曰。所言公。公言之。所言私。王者無私。夫翰林為樞機宥密之地。其所慎者事之微也。若制置任用。則非王者之私。漢制尚書郎主作文書起草。更直於建禮門內臺。給青縑白綾。或以錦被帷帳氈褥。畫通中枕。大官供食。湯官供餅餌五熟果。五日一美食。下天子一等。建禮門內得神仙門。神仙門內得明光殿。神仙殿內得省中。內得省中。一本作自門下省中書省。蓋與今翰林之制畧同。而所掌輕也。漢武帝時嚴助朱買臣吾丘壽王司馬相如東方朔枚臯之徒皆在左右。是時朝廷多事。中外論難。大臣數誄亦其事也。唐興太宗始於秦府開文學館。擢房玄齡杜如晦等一十八人。皆以本官兼學士。給五品珍膳。分為三番。更直宿於閣下。討論墳典。時人號為登瀛洲。正觀初置弘文館學士。聽朝之隙。引入內殿。講論文義。商較時政。或夜分而罷。至玄宗朝。置麗正殿學士。名儒大臣皆在其中。後改為集仙。一無集仙二字。集賢殿亦草書詔。至翰

林置學士。集賢書詔乃罷。初國朝循梁陳故事。中書舍人六員。專掌詔誥。雖曰禁省。猶非密切。故溫大雅。魏徵。李百藥。岑文本。褚遂良。許敬宗。上官儀。時召草制。未有名號。乾封已後。始曰北門學士。劉懿之。劉禕之。周思茂。元萬頃。范履冰為之。則天朝。則蘇味道。韋承慶。其後上官昭容獨掌其事。睿宗朝。則薛稷。賈膺福。崔湜。玄宗朝。初改為翰林待詔。張說。陸堅。張九齡。徐安貞。相繼為之。又改為翰林供奉。開元二十六年。劉光謙。張垠。乃為學士。始別建學士院于翰林院之南。又有韓紘。前作胡閻。伯璵。一本作興。孟匡朝。陳兼。李白。蔣鎮。在舊翰林院。雖有其名。而不職其事。至德之後。翰林院始兼學士之名。代宗初。李泌為學士。而今壁記不列名氏。蓋以不職事故也。德宗雅尚文學。注意是選。乘輿每幸學士院。顧問錫賚。無所不至。御饌珍羞。輟而賜之。又嘗召對於浴堂門。移院於金鑾殿。對御起草賦詩。唱和。或旬日不出。吳通微兄弟。同時擢用。與陸贄爭恩。甚於水火。天下醜之。貞元末。寄任尤重。時人謂之內相。而上多疑忌。動必拘防。有守官十三考。而不遷者。故當時言內職者。多滯相半。及順宗不懌。儲位未立。王叔文起於非類。竊學士之名。內連牛美人。李忠言。外結奸黨。取兵柄弄權。天下震駭。是時鄭絪為內庭之老。首定大計。今上即位。授絪中書侍郎平章事。

初姜公輔行在命相。及綰就第而拜。至李吉甫除中書侍郎平章事。適與裴垪同直。垪草吉甫制。而吉甫草武元衡制。垂簾揮翰。兩不相知。及暮。吉甫有歎惋之聲。垪終不言。書麻尾之後。乃相慶賀。禮絕之敬。生於座中。犁明。院內使學士送至銀臺門。而相府官吏候于門外。禁署之盛。未有也。凡學士無定員。皆以他官充。下至校書郎。上至諸曹尚書。皆得為之。既入與班行絕迹。不拘本司。不繫朝謁常參。守官二周為滿歲。則遷。知制誥一周歲為遷官。則奏就本司判記。上月日。北省官宰相送上。南省官給舍丞郎送上。興元元年。勅翰林學士朝服班序。宜准諸司官知制誥例。凡初遷者。中書門下召令右銀臺門候旨。其日入院。試制書批荅共三道。詩一首。自張仲素後。加賦一首。試畢封進。可者翌日受宜。乃定。事下中書門下。於麟德殿候對。本院賜宴。營幕使宿設帳幄。圖褥尚食。使供珍饌。酒坊使供美酒。是為勅設。序立拜恩訖。然後然後。然後一作候字。就宴。又賜衣一副。絹三十疋。飛龍司借馬一疋。旬日又進舊文章一本。一本作旬日又進文一軸。內庫給青綺錦被。錦元作綿。青綺無綿被。綿元作錦。一本無此五字。青綺方裕。青綾單帕。漆通中枕。銅鏡漆奩。象篋大小銅背枕。背一作背。象梳漆箱。銅擘羅。一本銅背枕在此下。紫絲履。白布手巾。衣架畫木床。一本作畫木。

床。無衣字。爐。爐一本作鑪。銅二字。案席氈裯之類畢。內諸司供膳飲之物。主膳四人掌之。又內園官一戶三人以供使令。其所乘馬迎送於櫺仗門內橫門之西。度支月給手力資四人。人錢三千五百。四品已上加一人。每歲內賜春服物三十疋。暑服物二十疋。寒服物三十疋。綿十屯。寒食節絹絹一作料字三十疋。酒飴杏酪粥屑肉啗。清明新火。二社蒸餅饅餅端午衣一副。金花銀器一事。百索一軸。青團鏤竹大扇一柄。角糴。三服麩蜜重陽酒。糖粉糕葉。至冬歲酒。兔野雞。其餘時果。新茗。水瓜。新曆。是為經制。直日就院頒授。下直就第賜之。凡內宴坐次於宰相坐。居一品班之上。別賜酒食珍果與宰相同。賜錦二十疋。錦一本作帛。金花銀器一事。貞元四年。勅每晦日上巳重陽三節。百寮宴樂。翰林學士每節賜錢一百緡。其日奏出選勝遊會。賜酒脯茶果。明年廢。晦日置中和節宴樂如之。非凶旱兵革則每歲為常。凡元正冬至不受朝。俱進名奉賀。大忌進名奉慰。其日尚食供素饌。賜茶十串。凡郊廟大禮。乘輿行幸。皆設幕次于御幄之側。侍從親近人臣。第一御舍元殿丹鳳樓。則二人於宮中乘馬隨。隨一本作引。駕出殿門。徐出就班次。凡當直之法。法一作次。自給舍丞郎入者。三直無襪。自起居侍御郎官入。五直一襪。自御史補闕拾遺入者。七直二襪。其餘雜入

者十直三徼。新遷官一直服假。各於准式之中。一本作服假名於次之中。減半。著為別條例。題于北廳之西閣。一無別字。廳一作壁。凡交直俟內朝之退。不過辰巳。入者先之。出者後之。踈數視人之衆寡。事之勞逸。隨時之動靜。凡節國忌授衣。二分田假之令。不霑有不時而集。併夜而宿者。五代職官志。後唐明宗天城三年八月。勅掌綸之任。擢才以居。或自初命而升。或自顯秩而授。蓋重厥職。靡繫其官。雖事分皆同。而行綴或異。誠由往日未有定規。議官位則上下不常。論職次則後先為當。宜行顯命。以正近班。今後翰林學士入院。並以先後為定。唯承旨一員。出自朕意。不計官資先後。在學士之上。仍編入翰林志。其年十一月。勅新除翰林學士張昭遠。早踐綸闈。久司史筆。曾居憲府。累涉貳卿。今既擢在禁林。所宜別宣班序。其立位宜次崔旻。晉天福五年。詔曰。六典云中書舍人掌侍奉進奏。參議表章。凡詔旨制敕。璽書策命。皆案故事起草進畫。既下則署而行之。其禁有四。一曰漏泄。二曰稽緩。三曰違失。四曰志誤。所以重王命也。古昔已來。典實斯在。爰從近代。別創新名。今運屬興王。事從師古。俾仍舊貫。以耀前規。其翰林學士院公事。宜並歸中書舍人。從宰相馮道之奏也。自是舍人畫直者。當中書制。夜直者。當內制。至開運元年。復詔曰。翰林學士與中書

舍人。分為兩制。各置六員。偶自近年。權停內署。况司詔命。必在深嚴。將使從宜。却仍舊貫。宜復置學士院。蓋宰臣桑維翰秉政。將戾於道。故乃復焉。自此班秩再有倫矣。五年。一本作六年。五代史。晉天福五年五月丙午。詔曰。承旨者。承時君之旨。非近侍重臣。無以稟朕命。宣予言。是以大朝會。宰臣承旨。草制詔。學士承旨。若無區別。何表等威。除翰林承旨外。殿前承旨。宜改為殿直。密院承旨。宜改為承宣。御史臺三司閤門客省。所有承旨。並令別定其名。周顯德五年。詔翰林學士。職係禁庭。地居親近。與班行而既異。在朝請以宜殊。起今以後。當直下直。學士並宜令逐日起居。其當直學士。仍赴晚朝。舊制翰林院學士。與常參官。五日一度起居。時世宗欲令朝夕謁見。訪以時事。故有是詔。已上三件。並見蘇易簡續翰林志。蘇易簡續翰林志。凡儼直之數。上自諸行尚書。三十五直。下至白身。一百四十直。必須圓融。其直先五直。舊學士一點。次三直。一點。又次二直。一點。此三等。隨日多少。令其均勻。永為定式。晉開運中。楊昭儉直綸閣。酌其從來儼直之數。等第除減。條為定式。申中書門下。仍刻石在壁。員外郎入舊八十直。改為五十直。郎中入舊六十直。今改為四十直。他官入舊一百直。改為八十直。自員外郎知制誥。轉正郎。仍舊知先六十直。改為三十直。正拜

舍人舊四十直。今為二十直。自常侍諫議給事拜舍人。舊四十直。今為二十直。應舊官再入。約前任減半。今附于此。貴存舊章。其內制。裸直及吉凶疾病諸假。則例具翰林舊規。學士起復之制。周朝已前。未聞其例。周世宗時。故內翰王著。今揆相李公昉。俱遭內艱。屬世宗北伐。並起復隨駕。書詔繁委之際。即不違叙。合裸直與不裸直。迄皇朝端拱元年。閏五月。蘇易簡遭家艱難。奉詔抑奪。遂與翰林以下商議。依鳳閣壁記體例。同舊官再入。約計前直減半。是時復裸直二十五直矣。至皇朝今揆相李公獨直禁林。奉旨令每雙日夜直。隻日下直。可以永為通式也。四禁之中。漏洩為最。故草制之夕。遲明必闔門之雙扉。當制學士坐於玉堂上。止吏人之出入者。俟宣制訖。方啓戶。馬文翰之職。優待之異者。太祖英武聖文神德皇帝。因置酒于紫雲樓下。命兩制侍宴。歡甚。因命中書舍人來晨宜輟一本作綴內置起居。今為通式。仍各賜書千卷。以備檢閱。舊體每遊。醺止學士得赴召。暨皇上留心儒術。旌賞文翰。時綸閣之士。始召赴曲宴。或令和御詩。舍人從遊。宴自此始也。厥後立春。鏤飾銀彩。幡勝之物。亦及之。其或觀稼於南薰門。賞花於含芳園。春晝嚴蹕。百司景從。幸國西之金明池。下雕輦。登龍舟。都人駕肩。百樂具舉。憇瓊林苑。由復道御層樓。臨軒置酒。以閱繁

盛。兩制必侍從馬。至上林春融。千花萬卉。妍麗冠絕。上必曲宴宰衡。勲舊。召兩制詞臣。俯龍池。垂金鈎。舉觴賦詩。終日而罷。上嘗謂宰執近臣曰。詞臣實神僊之職也。翊日。凡所進詩。悉迴御毫。屬和以賜焉。雍熙三年十月。勅曰。兩制詞臣。公朝精選。典司綸誥。親近冕旒。宜於俸祿之間。特示優異。起今後兩制俸料。並以見絀充上。聽政之暇。搜訪鍾王之迹。以資閱翫焉。御毫飛動。神機妙思。出其軌制。乃召書學之有格性者。置於便殿。躬自省閱。仍授以筆法。既觀其有成者。錫以銀章象笏。令入院充待詔者八人。自是書詔四出。寰海之內。咸識禁中之墨妙焉。舊體學士。凡召入院。止賜

白成釘

廣韻。都了切。釘。缺帶頭飾。出聲譜禮韻。音了。飾。玦謂之釘。口銀鞍

勒馬。暨今上即位。優待特異。賜金鍍銀鬧裝鞍勒馬。對衣荔枝金帶。郊禋

禮畢。賜對衣金帶。或牯犀帶。金魚副之。朝士自唐末久闕佩魚者。迄今方

復之。十月朔。舊賜對衣紅錦袍。上特以細花熟錦袍代之。淳化二年冬。代

以細花盤鵬錦袍。其制下丞相一等。自是遠方之珍果。天府之法釀。龍鳳

之茗。莛伏臘之餅餌。以時而賜。悉加等焉。玉堂東西壁。延袤數丈。悉畫水

以布之。風濤浩渺。蓋擬瀛洲之象也。待詔董羽之筆。脩篁皓鶴。悉圖廊廡。

竒花異木。羅植軒砌。每外喧已寂。內務不至。風傳禁漏。月色滿庭。真人世

僊境也。每學士拜命。先閣門受制書。於常朝殿門階上拜伏跪受訖。於便殿對敷。陳述寵用遭值之由。謂之告謝。上必從容賜座。以茶藥而退。選日謝恩。前一日。待詔一人就宅宣召。預於庭設褥。堂設酒醴。待詔稱有勅。望皇居拜伏聽命。其辭皆獎飾嚴召之意。又舞蹈訖。升堂飲饌。以謝恩。奏狀拜伏跪授之。來日待詔迎於待漏院。與新學士偕行。引至閣門而退。閣門舍人始引入中謝。賜對衣金帶金塗鞍勒馬。近列就院轉官。惟承旨得賜分物。勅設如初拜之禮。餘不得比。入本院上事。宣徽院告報。勅設儀鸞宿陳帟幕。太官備珍饌。設上尊酒茗果畢。至赴是設者。止鳳閣舍人。餘不得預坐。舊體禁中事。元無樂。前代或有令伎藝之弄獼猴藏珠之戲者。玉堂之上。惟上事受使人賀禮。始得正坐。餘雖承旨亦須座於東廂。其副翰座西廂。餘依雙隻對坐。居是職者。人物之選亦已極矣。儒墨之榮亦已至矣。苟能節用以安貧。杜門以省事。探真如之旨。養浩然之氣。來者瞻望其出處。時君優假其顏色。逍遙卒歲。非神僊而何。每上直一依舊制。入者先之。出者後之。或會食日旰之後。同列出院。當其日直學士。苟已褫巾笏。則可紗帽鞞履。送至玉堂之簾下。蓋同列相恕其坦率也。或禁直垂簾人靜之際。則有中使忽降。持御詩宣令屬和。則必尋拜謝狀後。信宿方和進。

如聲韻奇險。難以賡載者。必拜章瀝懇。陳述寡和之意。優詔多免焉。每錫謝恩奏狀。必當直草。或郊裡行慶。制命填委。必聚廳以分草之。其餘書詔辭祝。頃刻之間。雖繽紛而至。必獨當之。或數直有不草一詞者。自可探賸往誥。研窮理體。以備顧問焉。李肇翰林志曰。凡將相誥身。並用金花五色綾紙。唐乾寧二年。李鋌自黔南節相。授京兆尹。兩次咨報中書。用白綾紙。金親王將相誥身。並用金花五色背綾紙。皇后貴主。用金花五色背羅紙。不帶使相者。用金花五色白背綾紙。觀察使。及叅知政事。樞密副使。簽署樞密院公事。並五色綾紙。無金花。諸蕃酋長。蠻王鬼主。官告。中書省草詞。送學士院寫。皆五色綾。白背紙。皆新例也。例一作制。舊體樞密使未帶使相者。不宣麻。至周太祖初。潛歷是任。乃宣制於公朝。今之宣麻。自周太祖始也。蘇耆次續翰林志。唐制。學士每有除拜他職。必納光院錢。以為公用。自丞相而下。各有差等。五代以還。其儀久闕。公振舉而復之。國朝舊制。有殿前承旨。頗甚繁雜。及公拜翰林承旨。上以其稱呼不別。又惡其與清貴混淆。詔改為三班奉職。以避其稱也。草麻潤筆。自隋唐已來。皆有之。鄭譯。隋文時。自隆州刺史復國公爵。令李德林作詔。高穎戲之曰。筆頭乾。譯荅曰。出為方伯。策杖而歸。不得一錢。何以潤筆。近朝武臣移鎮。

及大僚除拜。因循多不送遺。先帝以公久在內庭。慮經費有闕。特定草麻
例物。朝謝日。命閤門督之。既得。仍以書進呈。自是無敢有闕者。迄今以為
定制。國朝淳化二年。命翰林學士賈黃中。蘇易簡。同勾當。差遣院李沆。同
判吏部流內銓。學士領外司。自此始也。至和元年。翰林學士楊察為承旨。
知制誥。呂溱。王洙。並為翰林學士。故事。學士六員。今洙為第七員。蓋宰相
過除也。宰相一作丞相。元祐官品。令翰林學士承旨。翰林學士。正三品。
唐韋澳。大中年為翰林學士承旨。與同寮蕭寘深為宣宗所遇。二人同直。
無不召見。詢訪時事。每有邦國刑政大事。中使傳宣草詞。澳心欲論諫。即
曰。此一事須降御札。方敢施行。遲留至再。且必論其可否。帝多從之。元
稹。翰林學士承旨。記曰。舊制學士無得以承旨為名者。應對顧問。叅會第
班。一本作旅次班。第以官為上下。憲宗以永貞元年即大位。始命鄭絪為
承旨學士。位在諸學士之上。居在東第一閤。乘輿奉郊廟。輒得乘廐馬。自
浴殿由內朝以從。揭雞竿。布大澤。得升丹鳳之西南隅。外賓客進見於麟
德。則止直禁中以俟。凡大詔令。大廢置。丞相之密畫。內外之密奏。上之所
甚注意者。莫不專受專對。他人無得而叅也。五代後唐同光中。賜承旨
學士盧質。論思翊佐功臣。旋授節制河中。馮瀛王送之詩云。視草北來唐

學士擁旄西去漢將軍。時人榮之。周陶穀自以官居八座位至承旨且欲軋同列之官卑者乃起請令今後學士合班儀在諸行侍郎之下。如官至丞郎者即在常侍之上。官至尚書者依本班迄今以為准。宋淳化二年翰林學士承旨蘇易簡獻續翰林志二卷。詔藏於史館。仍賜御詩二章以寵之。批云賜詩之意。因卿進續翰林志美卿居清華之地也。上又書玉堂之署四字以賜易簡。因謂宰相曰易簡告朕求此數字。卿可召至中書授之。他日為翰林中美事。淳化四年上草書宋玉大言賦賜蘇易簡。易簡因擬宋玉作大言賦以獻。其詞曰皇帝書白龍牋作大言賦賜玉堂臣易簡。御筆煌煌雄詞洋洋瓌璋博達不可備詳。詔易簡陞殿躬指其理且歎宋王之竒恠也。因伏而奏曰恨宋玉不與陛下同時。帝曰噫何代無人焉。卿為朕言之。易簡曰聖人興兮告成功。登崑崙兮展升中。芳席地一作地為席兮饗祖宗。天籟起一作起籟兮調笙鏞。日烏月兔耀文明也。參旗井鉞嚴武衛也。執北斗兮奠玄酒也。削西華兮為石礪也。飛雲湧霞騰騰騰。一作燔燎也。剗鯨腊鵬代鷄鯨也。迅雷三發山神呼也。流電三激燿火舉也。禮冊獻冊一作載兮溥風還。君百拜兮天神歡。四時一周兮萬八千年。太山融一作夷兮溟海乾。圓蓋穴一作空兮方輿穿。君王壽兮無疆一

作窮焉。時殿上皆呼萬歲。上覽之喜賞。賜手詔以褒之。治平三年。以端明殿學士兼龍圖閣學士知徐州張方平為翰林學士承旨。初。上謂執政曰。學士獨王珪能為詔。餘多不稱職。因問方平文學如何。歐陽脩對曰。方平亦有文學。但挾邪不直。曾公亮以為不聞其挾邪。趙槩又以為無迹。故至是命之。筆談。王堂承旨閤子。櫳格上有火燃。太宗嘗夜幸玉堂。蘇易簡為學士。已寢遽起。無燭具衣冠。宮嬪自櫳格引燭入照之。至今不欲更易。以為王堂一盛事。**事物紀原**職林曰。至德以後。翰林置學士六人。內年深德重者一人為承旨。所以獨承密命故也。此疑承旨之始也。而唐百官志曰。元和中。翰林學士以院長一人別承勅旨。或密受顧命。為學士承旨。職林又謂德宗正元已後。承旨多至宰相。疑唐志為誤。**事文類聚**號令典冊皆更其手。李德裕集鄭綱為內庭之老。首定大計。翰林志唐韓偓。昭宗時進承旨。處事機密。與帝意合。本傳順宗風噤不能言。時太子未立。牛美人有異志。中外洶懼。召鄭綱草立儲制。綱搦管便書立嫡。以長四字。跪而上呈。乃定憲宗。綱之力也。即位拜平章事。韓偓進承旨。宰相韋貽範母喪。詔還位。偓當草制。曰。腕可斷。麻不可草。韓維除翰林學士承旨。神宗命公草詔求直言。詔出。人情大悅。言行錄蘇易簡為承旨。當禁直。以

水試歌噐。太宗曰：聞卿所玩，非歌噐耶？易簡曰：然。乃進曰：日中則昃，月滿則虧，噐盈則覆，物盛則衰。願陛下持盈守成，念終如始，固萬世之業，則幸甚。言行錄：張方平為承旨，神宗親劄曰：卿文章典雅，煥然有三代之風，而又善以多為少，意博辭寡，雖古訓誥亦無以加也。王拱辰自承旨除參政，不數日以憂服去。徐以宣徽使召熙寧間，王珪為承旨，韓絳戲之曰：行將入宣徽矣，未幾除參政，遂大拜。近世承旨之達無比此也。同上故事。知制誥必試。仁宗知歐陽脩有文有旨，不試。後遷承旨。本傳：章得象處性簡重，在翰林十二年，怡然自得。事畧：淳化二年十二月，承旨蘇易簡於本院會學士等觀飛白及二等書體，帝聞之，賜上尊酒。太官設饌，各賦七言詩。宰相參政亦各賦詩。易簡悉以上聞。翌日，帝曰：朕諷讀數四，有以見儒墨之盛，學士之貴也。會要：太宗時，賈黃中、宋白、李至、呂蒙正、蘇易簡五人同時拜翰林學士承旨。扈蒙贈之詩云：五鳳齊飛入翰林，其後呂為相。賈李蘇參政。宋為尚書。廬陵詩注：淳化二年十月，承旨蘇易簡請以御賜二詩刻石。帝為真草行三體，命待詔刻石以賜易簡。蘇志：蘇參政易簡登科時，宋尚書曰：為南省主文。後七年，宋為翰林學士承旨，而蘇相繼入院，同為學士。宋嘗贈詩云：昔日曾為尺木階，今朝真是青雲友。歐陽文忠公亦然。

王禹偁南省主文。相距十五年。同為學士。故歐公詩。有喜君新賜黃金帶。顧我今為白髮翁之句。二事誠一時文物之盛也。翰苑群書。新唐書沈傳師傳。傳師召入翰林為學士。改中書舍人。翰林缺承旨。次當傳師。穆宗欲面命。辭曰。學士院長。叅天子密議。次為宰相。臣自知必不能。願治人一方。為陛下長養之。因稱疾出。帝遣中使敦召。李德裕素與善。開曉諄切。終不出。遂以本官兼史職。宋史列傳。蘇易簡淳化二年。同知京朝官考課。遷中書舍人。充承旨。先是曲宴將相。翰林學士皆預坐。梁迥啓太祖罷之。又皇帝御丹鳳樓。翰林承旨侍從。升樓西南隅。禮亦廢。至是。易簡請之。皆復舊制。百官志。掌制誥詔令撰述之事。承旨不常置。以學士久次者為之。元史百官志。翰林兼國史院。秩正二品。中統初。以王鶚為翰林學士。未立官署。至元元年始置。秩正三品。六年。置承旨三員。十四年。增承旨一員。十七年。增承旨二員。二十七年。增承旨一員。大德九年。陞正二品。至大元年。置承旨九員。皇慶元年。陞從一品。五年。置承旨八員。後定置承旨六員。從一品。十二年。別立翰林院。置承旨一員。十八年。增承旨一員。二十九年。增承旨一員。延祐二年。改司直為經歷。後定置承旨七員。阿魯圖博爾木四世孫。父木忽刺。阿魯圖由經正監。襲為怯薛官。掌環衛。遂拜翰林學士承

旨。太平字允中。初姓賀氏。名惟一。後賜姓蒙古氏。名太平。仁傑之孫。勝之子也。資性開朗。正大。雖在弱齡。然如老成人。嘗授業於趙孟頫。文宗召為工部尚書。至正五年。遷宣徽院使。六年。帝請擢居近職。七年。詔特賜姓。而改其名。遷中書平章政事。十一月。拜太平左丞相。明年正月。詔脩后妃功臣傳。九年七月。罷為翰林學士承旨。達識帖睦迺字九成。幼與其兄鐵木兒塔識。俱入國學。為諸生。讀經史。悉能通大義。尤好學書。初以世胄補官。為太府監提點。擢治書侍御史。以言罷。除樞密院同知。陞中書右丞。翰林承旨。夔夔字子山。康里氏。幼隸業國學。博通群書。其正心脩身之要。得諸許衡。及父兄家傳。長襲宿衛。風神凝遠。制行峻潔。望而知其為貴介公子。始授承直郎。遷兵部郎中。拜監察御史。復除江南行臺治書侍御史。未行。留為奎章閣學士。復留為大學士。知經筵事。尋拜翰林學士承旨。文用字彥俊之第三子也。生十歲。父死。長兄文炳教諸弟有法。文用學問早成。弱冠。試問賦。中選。遷大司農。時欲奪民田為屯田。文用固執不可。遷為翰林學士承旨。王思廉字仲常。幼師太原元。好問。至元十年。董文忠薦之。世祖問文忠曰。汝何由知王思廉賢。對曰。鄉人之善者。稱之也。遂召見。授符寶局掌書。每侍讀。帝命御史大夫王速帖木兒。太師月赤察兒。御

史中丞撒里蠻。翰林學士承旨。掇立察等。咸聽受焉。歷官至太子賓客。仁宗即位。以翰林學士承旨資善大夫致仕卒。贈翰林學士承旨。資善大夫。河南江北等處行中書省右丞。上護軍。追封衡山郡公。謚文恭。王暉。字仲謀。衛州汲縣人。曾祖經。祖守。仕金。官敦武校尉。父天鐸。暉。至大初。以律學中首選。仕至戶部主事。大德八年六月卒。贈翰林學士承旨。資善大夫。追封太原郡公。謚文定。張孔孫。字夢符。其先世出遼之烏若部。為金人所并。遂遷隆安。父之純。為東平萬戶府參議。請老還家。拜翰林學士承旨。資善大夫致仕。劉庚。字熙載。洺水人。五世祖逸。以郡吏治獄有陰德。祖肅。為右三部尚書。庚幼有文名。師事翰林學士。至大德二年。遷禮部尚書。仍兼翰林學士。尋拜侍御史。頃之。還翰林學士承旨。兼國子祭酒。延祐元年。復為承旨。陳顥。字仲明。其先居盧龍。有名山者。仕金。為謀克監軍。大祖得之。以為平陽等路軍民都元帥。子孫徙清州。遂為清州人。顥幼穎悟。日記誦千百言。稍長。游京師。登翰林承旨。梁曾。字貢父。燕人。祖守正。父德曾。少好學。日記書數千言。中統四年。以翰林學士承旨。王鶚薦。辟中書左三部令史。三轉為中書省掾。耶律希亮。字明甫。楚材之孫。鑄之子也。先世皆讀儒書。九歲能詩賦。至大二年。武宗訪求先朝舊臣。特除翰林學

士承旨。資善大夫。尋改除翰林學士承旨。詳本傳。趙世延。字子敬。其先雍古族人。天資秀發。喜讀書。究心儒者體用之學。弱冠。世祖召見。俾入樞密院。御史臺肄習官政。至大三年。尋陞翰林學士承旨。詳本傳。歐陽玄。字原功。其先家廬陵。與文忠公脩同所自出。其母李氏親授孝經論語小學諸書。八歲能成誦。日記數千言。元祐元年。詔設科取士。明年。賜進士出身。調太平蕪湖縣尹。帝以玄歷仕累朝。且有修三史功。諭旨丞相。超授爵秩。遂擬拜翰林學士承旨。已而乞致仕。帝不允。復拜翰林學士承旨。屢乞致仕。不允。仍前翰林學士承旨。進階光祿大夫。至元十七年。卒於崇教里之寓舍。李好文。字惟中。大名之東明人。登至治元年進士第。為翰林國史院編修。久之。陞翰林學士承旨。皇太子深敬而嘉納之。後屢引年。及至仕。辭至再三。遂拜光祿大夫。河南行省平章政事。仍以翰林學士承旨。一品祿終其身。劉敏中。字端甫。濟南章丘人。幼卓異不凡。年十三。語其父景石曰。昔賢足於學而不求知。豐於功而不自銜。此後人之所弗逮。父竒之。鄉先生杜仁傑愛其文。咸稱之。敏中嘗與同儕各言其志曰。自幼至老。相見而無愧色。乃吾志也。至元十一年。由中書掾擢兵部主事。拜監察御史。為淮西肅政廉訪使。轉山東宣慰使。遂召為翰林學士承旨。陳思謙。字景

讓其家世見祖祐傳中。思謙少警敏好學。凡名物度數。綱紀本末。考訂詳究。尤深於邵子。皇極經世書。文宗天曆初政。收攬賢能。丞相高昌王亦都護舉思謙。時年四十矣。召見與聖官。授典寶。尋為集賢侍講學士。以年近七十。上章乞老不允。仍授御史中丞。卒。贈宣猷秉憲佐治功臣。翰林學士承旨。榮祿大夫。柱國。追封魯國公。謚通敏。亦憐真班。西夏人。父俺伯。以忠勤事世祖。為知樞密院事。至順初。拜翰林學士承旨。榮祿大夫。遷功德使。指揮使如故。尋出為陝西行省平章政事。未行。復為翰林學士承旨。王時以文學顯。歷仕中書。叅知政事。至左丞。以翰林學士承旨致仕。張翥字仲舉。晉寧人。少時負其材雋。豪放不羈。好蹴鞠。喜音樂。不以家業屑其意。其父以為憂。翥一旦翻然謝客。閉門讀書。晝夜不暫輟。因授業於李存先生。至正初。召為國子助教。退居淮東。會朝廷脩遼金宋三史。為翰林編修。史成。遷太常博士。累陞侍講學士。搨思監善之。除集賢學士。俄以翰林學士承旨致仕。階榮祿大夫。後詔乃以翥為河南行省平章政事。仍翰林學士承旨。唐元稹集翰林承旨學士記。舊制學士無得以承旨為名者。應對顧問。叅會旅次班第。以官為上下。憲宗章武孝皇帝。以永貞元年即大位。始命鄭公為承旨學士。位在諸學士上。居在東第一閣。乘輿奉郊

廟輒得乘廐馬。自浴殿由內朝以從。揚雞竿。布大澤。則丹鳳之西南隅。外則賓客進見於麟德。則止直禁中以俟。大凡大誥令。大廢置。丞相之密畫。內外之密奏。上之所甚注意者。莫不專對。他人無得而參。非自異也。法不當言用。是十七年間。由鄭至杜十一人。而九參大政。其不至者。衛詔及門而返。事適然也。禁省中。徧傳其事。至於張則弄相印以俟其病。間者久之。卒不典命也已。若此。則安可以昧陋不肖之禎。繼居九丞相二名。卿之後乎。俛仰瞻睹。如遭大賓。每自誨其心曰。以若之不俊不明。而又使欲惡歆曲。攻於內。且決事於冥冥之中。無暴揚報效之言。不忿行私易也。然而陰潛之神。必有記善惡之餘者。以君父之遇。若如是。而猶舉枉錯直。可乎哉。使若之心。忽而為他人盡數。若之所為。而終不自愧。斯可矣。昔魯共王餘畫先賢於屋壁。以自警。臨我以十一賢之名氏。豈直自警哉。由是謹其遷授。書于座隅。長慶元年八月十日。記。宋蘇頌濱集。鄧溫伯免翰林承旨。不許。不允。詔二首。敕溫伯覽所奏。辭免恩命。事具悉。卿以文史足用。久在禁林。慎靖寡尤。首承密旨。雖云新命。率皆前官。尚此盤桓。固求引避。既違朝廷號令之信。徒有道路進退之嫌。其尚亟前。勿為煩請。所請宜不許。故茲詔示。想宜知悉。夏熟。卿比平安好。遣書指不多及。敕溫伯省所奏。辭。

免恩命事具悉。翰林以議論為官。而承旨以年德為選。茲所以歷求多士。復用舊人。卿既久在朝廷。當識朕意。遷延退託。雖多長者之風。號令文詞。宜得宿儒之用。成命不反。固辭實難。所請宜不允。故茲詔示。想宜知悉。夏熱。卿比平安好。遣書指不多及。**鄭獬** **郎溪集**翰林學士給事中王珪可承旨制。唐學士六人。而年德最茂者。遷為承旨。深謀祕論。率得預聞。當時諸公。由此以攝大柄者。踵相躡也。其官某風華秀整。處謙履順。文章雄駉。如群馬之四馳。更直玉堂。已踰一紀。比之數子。乃為舊德。進承密詔。僉曰。然哉。朕方以乾剛斷天下。又得爾老筆輔之。風飛霆擊。以令四方。其孰有不從哉。可。**李綱** **集**翰林學士除承旨。詔視草北門。克著論思之益。陞華東閣。式昭寵遇之優。我有俊臣。宜膺妙選。其官某器度凝遠。資識敏明。有經世之宏材。有博古之奧學。蚤蒙識擢。寢歷清華。由言語侍從之班。司翰墨文章之任。入奉清閒之燕。每輸獻納之忠。嘉言閎議。足以啓沃朕心。大冊高文。足以鼓動當世。休有譽處。恬然靖共。惟潤色久留於禁林。宜顧問獨承於密旨。爰舉褒陞之典。以明因任之方。穆于師言。敬自朕志。爾其攄發素蘊。益究遠圖。使號令溫醇。無愧兩漢之烈。訓辭灑噩。有同三代之風。則予汝嘉。是為稱職。**許景衡** **橫塘集**吳玠翰林學士承旨。詔勅學士職

親地禁而承旨為之長。宜得年德俱高而文采絕人者。自朕臨御未始假人具官其博洽之學。瑰偉之文。方其少時。見謂秀出。更踐中外。垂三十年。而益進。業益精。名實堀然。在諸儒右。既還朝廷。進掌文翰。論議英發。裨益為多。則受顧問。被密旨者。宜屬之誰耶。昔李絳裴垪輩。開陳治道。料敵制勝。元和之政。實有賴焉。惟汝勉之。周俾二三子。專美有唐。則朕汝嘉可慕。**容彥逢**擢**文堂集**鄧洵仁除翰林學士承旨誥勅學士視草玉堂極儒臣之寵。而承旨專奉密命。則又以其久次者為之。祖宗已來。士之與此。蓋無幾也。其官其業。履端靖問。學醇深。揚歷清華。進掌內制。文章論議。聲實顯隆。閱日滋多。朕所矚察。宜以舊制。冠于禁林。往其懋承。以副寵渥。可。**蘇東坡集**翰林承旨謝表。使星下燭。生蓬華之光華。天澤旁流。及桑榆之枯槁。國有用儒之盛。士知稽古之榮。伏以翰墨之林。號稱內相。文章之外。不取他才。至於用人。可以觀政。文武并用。或成頗牧之功。邪正雜居。至有任文之患。惟貴且近。故難其人。而况金鑿玉堂。親被絲綸之密。北扉東閣。獨稱年德之高。必有異人。以齊衆口。而臣本緣衰病。出守江湖。以一方凋弊之餘。當二年水潦之厄。戴星而治。僅免流亡。及召而還。恍於夢寐。交親迎勞。井邑聚觀。驚華髮之半空。笑丹心之未報。宜投閑散。以養衰殘。豈期

過採於虛名。復使榮加於舊物。此蓋伏遇皇帝陛下。德如乾健。明配日中。既祖述於堯仁。復躬行於舜孝。才難之嘆。人誦斯言。緣先帝之德音。收孤臣於散地。言雖直而無罪。身愈遠而益親。委曲保全。始終錄用。臣敢不更磨朽鈍。少補涓埃。難得者時。未有捐軀之會。勿欺而犯。誓無患失之心。臣無任感天賀聖。激切屏營之至。再入翰林謝表。衰遲無用。寵既溢於當年。天眷有加。恩復隆於晚節。使華臨幸。天語丁寧。聳里巷之驚觀。歎朝廷之用舊。伏以禁林分直。法本六人。帝語親承。舊惟一老。不緣名次之先後。斷自上心之簡求。冠內朝供奉之班。極儒者遭逢之盛。凡膺此選。宜得異材。而臣本以愚庸。累塵器使。初無已試之效。但多過實之名。千里闕庭。二年江海。憂深投杼。豈無三至之言。詔復賜環。不待一人之譽。此蓋伏遇太皇太后陛下。道無私載。公生至明。以七年之照臨。觀郡臣之邪正。知臣剛褊自用。雖有寬饒之狂。察臣忠鯁不移。庶幾長孺之守。故還舊物。益茂新恩。臣敢不早夜以思。死生不易。雖桑榆之景。已迫殘年。而犬馬之心。猶思後效。詔語春溫。再命而僂。使華天降。一節以趨。在故事以常聞。豈平生之敢望。省循非稱。愧汗交深。竊以視草之官。自唐為盛。雖職親事。號為北門學士之榮。而祿薄地寒。至有京兆掾曹之請。豈如聖代。一振儒風。

非徒好爵之縻。兼享太烹之養。玉堂賜篆。印渙化之彌文。寶帶重金。佩元豐之新渥。既厚其禮。愈難其人。而臣以空疎冗散之才。衰病流離之後。生還萬里。坐閱三千。不緣左右之容。躡處賢豪之上。此蓋伏遇皇帝陛下。生資文武。天祚聖神。雖亮陰不言。尚隱高宗之德。而訪落求助。已啓成王之心。首擇輔臣。求次法從。知人才之難得。采虛名而用臣。敢不益勵初心。以圖後效。才不逮古。雖慙內相之名。志常在民。庶免私人之謗。與鄧承旨

二帖。別來思仰益深。到郡即欲上問。因循至今。辱書教感。忤無量。比來履茲薄冷。台候康勝。詹望咫尺。莫由際集。尚冀順時為人自重。衰病日

加。得此便郡。蕭然乃無一事。平生守官。未有如今之適也。舊過潁州。亦樂土。但恐民事不如穎之絕少。爾嘯咏之樂。誰陪公者。計不負風月。餘非面莫究。忽忽播芳大全集。蘇子由謝宣召入翰林表。成命莫回。驚使華之促召。一家竦聽。望雲闕以馳情。實儒者之至榮。豈平生之敢望。竊以翰墨之職。始自有唐。供奉至尊。講聞前輩。北廊奏事。有如李絳之忠。中禁論兵。復數畢誠之智。迨我祖宗之盛。最優文學之臣。時舉舊章。多蒙召對。頃自恭默之後。稍虛顧問之常。方今聖德日躋。群臣屬目。蓋將前席以博問。繼夜燭而疇咨。宜得雋良。密侍燕語。如臣草野微陋。章句拙疎。十載江湖之

間。自群魚鳥。五遷臺省之要。求愧冠裳。敢謂乏人。遽令至此。此蓋伏遇皇
帝陛下。天心廣大。海德并包。物無一介之遺。意求萬目之舉。臨朝訪道。有
百辟之在前。燕處清心。援衆正而自助。從容盛德。循致承平。塵露之微。海
嶽奚補。脩列聖之故事。今將其時。因間見以納忠。素亦有志。周益公大全
集謝吏部尚書兼翰林承旨謝表。頻年入侍。徧塵清近之班。兩職並陞。
復冒殊尤之寵。賁服章於朽質。被羈策於名駒。異渥鼎來。危衷震惕。中謝
臣。伏聞漢以尚書為喉舌。唐以翰苑為腹心。明光畫省之嚴。夔龍接武。浴
殿金鑾之邃。頗牧在中。凡預選掄。已為要剽。矧疊膺於切組。足增耀於簪
紳。如臣者。天分弗高。人才甚下。自惟始願。不踰州縣之間。誰意晚塗。寢躡
賢豪之上。揆分數。祈於罷免。疏榮更誤於褒遷。冠秩序於南宮。進班聯於
東閣。胡瞻鶉特。久慙受祿之無功。兼取熊魚。彌愧舍生而取義。二儀施大。
一介命輕。此蓋伏遇皇帝陛下。文武生知。聖神廣運。使人也器。隨良窳以
無遺。與物為春。舉根莠而畢遂。是容賤士。仍點高門。惟聖朝法令之具存。
初不勞於裁鑿。而明主德功之俱懋。亦何待於論思。第當守三尺以不欺。
且復盡一心而無隱。庶持孤節。仰報鴻私。**蘇魏公集**謝翰林學士承旨表。
臣某。言今日。東頭供奉官充待詔董士隆至。臣所居。奉宣聖旨。召臣入

院充學士承旨者。綸出王言。擢預內庭之直。星馳使指。頓生陋巷之光。惴栗于中。彷徨靡措。伏以禁班親近。莫如學士之榮。密命對敷。更優承旨之貴。自元和之置職。逮聖世之右文。常擇有年德。可任用之人。使專大號。令與廢置之事。時則有若趙公之多聞博洽。鄭綱之小心兢謙。崔群識明治亂之分。李絳言為國家之利。入贊基宥。上副聖情。乃如昧陋不肖之倫。豈稱疇咨日俞之命。伏念臣稟生不厚。操術無竒。姑緣門業之傳。預數文林之末。歷茲四朝之久。浸塵簪橐之聯。荷以二聖之知。寘於喉舌之地。以天官掌選之重。兼金華進讀之員。內省至愚。最為孤立。每自憐於介特。况已迫於衰遲。嚮祈辭剝。而引年再被發中之賜。詔復遷延於省部。實出優容。雖勉彊於簿書。愈深惕厲。豈謂伏蒙皇帝陛下。矜憐孤直。曲賜生成。因圖任於舊人。俾奉行於別旨。望複門之祕邃。恍若神游。念繼世之遭逢。重為榮遇。惟先臣之昔仕。被仁祖之深知。再踐禁林。常承於晝訪。屢陳讜議。每見於褒稱。愴徂歲之如流。偶遺孤之未殞。逮此非常之寵。復叨采厚之恩。對捧芝泥。感極而繼之以泣。仰酬渥澤。力殫而豈敢愛生。惟當夙夜在公。靖共爾位。視執花而直入。始務恪勤。問溫木而不言。益思兢慎。自餘謹職業之守。罄傾輸之誠。知無不為。死而後已。臣無任。臣某言。今日日東

頭供奉官充待詔董士隆至臣所居奉宣聖旨召臣入院充學士承旨者
內庭進職方拜於綸函使駟臨門復膺於召節恭聆宣語益集汗顏伏以
王者之言出為大號令學士之職入與上謨謀故李肇謂樞機之慎微執
誼以刀筆為餘事矧惟承旨之貴預間密畫之先職雖清閒事實要重往
當茲選未易其人必也忠言嘉謨可以動中於幾會隻簡片削可以風行
乎邇遐見於事功乃為宜稱如臣者學如涉水愚甚守株偶傳業於箕裘
幸繼榮於軒冕越自仁皇之在御獲叅東觀之讎書周旋衆務之間歷更
臺閣叨被兩宮之眷擢在省曹自司寇之詳刑領天官之大選三經歲序
慙無吏課之優再荷帝俞入備經闈之侍而臣衰年已暮孤立於時嘗陳
告老之誠未許容躬而去銓衡務重久任則鑒裁易疲犬馬齒衰勉彊則
顛隳是懼伏蒙太皇太后陛下如天之無不覆用人而不求全眷履歷之
最深雖耄憊而不棄深嚴禁路蒙非次之優遷密勿邇言俾居中而專受
因對時之異渥動追往之至懷言念先臣嘗更是職相望四紀顧陳迹以
猶存再踐複門愴遺孤之已老永思榮遇益念教忠固當佩服訓辭勤脩
素業如或使定禁中之詔草當竭見聞固不敢恃天子之私人輒喻分守
誓堅此志論報畢生臣無任王珪華陽集謝翰林學士承旨表 臣某言

今月十一日。待詔某至。臣所居奉宣宸指。召臣入院充學士承旨者。高門應召。甫听於溫言。丹地承恩。就更於華序。寵知上出。感自中深。臣其中謝竊以。極儒者之榮。獨高翰墨之選。鼓天下之動。莫如號令之孚。矧參基命之承。尤峻禁林之望。允圖鴻博。以訪請閒。若臣者。少孤多竒。晚學弗競。偶綴科於異等。旋廁跡於近途。西掖裁書。空歷五春之莫。北門侍詔。又驚一紀之餘。而臣材疎不足。經大猷。知短不能。防衆咥。微生江海之上。每意魚鳥之從。敢自幸於它迂。且獨矜於素守。豈悟右文之御。未遺孤進之臣。再召冠於嚴扉。使親聆於密旨。宮床賜錦。盡為新雋之人。仙嶺浮鱗。猶顧舊遊之客。茲蓋伏遇皇帝陛下。儲思神務。宣精帝文。方收器於群髦。亦錄瘞於舊物。雖承誤寵。不敢矯辭。三代同風。已屬漢功之茂。千齡復旦。維知舜德之逢。徒勉自思。未知所報。臣某無任。謝翰林學士承旨笏表。臣某言。伏蒙聖慈。賜臣官告勅牒各一道。授臣前件職者。禁林之召。使獨冠於近班。浴殿之趨。更親承於密旨。材之匪據。愧不知從。茲蓋伏遇皇帝陛下。收攬群英。顧憐舊物。念久塵於嚴近。特加錫於寵名。維殫素學之勤。庶荅曲成之造。臣某無任。洪公文安集謝除翰林學士承旨表。臣某言。伏奉告命。授臣翰林學士承旨。知制誥。已於今月十八日朝謝訖者。仙扃入直。已

漸辭藻之無功。帝語親承。忽拜絲綸之來下。循墻莫遂。跼地靡遑。中謝伏念。臣巾衍諛聞。弓裘末系。蚤辱知於壽聖。滯冒寵於嶽朝。翰苑鶴天。荐膺妙柬。甘泉豹尾。徧陟邇聯。當大典策之更新。豈安男子之足辦。正虞汰斥。敢意甄升。比獲覲於咫尺。用款陳於愚悃。清光俯逮。褒諭有加。侍五學之游。曾未乾於詔墨。奉九重之旨。乃疊被於恩章。絲中興數十年於茲。居是官。二三人而已。靖言高位。豈謂久虛。鳳檢下頒。初乏為容之助。鼇頭上畫。未知圖報之方。幸出意涯。榮非材稱。茲蓋伏遇皇帝陛下。體元居上。恭已正中。王言咸曰。大哉。豈特鋪張於鉅禮。聖主一見。決矣。方將鼓舞於群情。猥令極陋之蹤。遂玷非常之選。臣敢不激叩志氣。淬厲操修。長除書而善德音。顧何裨於潤色。領從官而聞政事。期不負於生成。臣無任。**王初寮先**

生集謝除翰林學士承旨并宣召表 臣今月十日。武翼大夫充學士院待詔馬清臣至。臣所居奉宣聖旨。召臣入院充學士承旨。冠擣文之禁直。已誤明揚。紆將命之使華。更叨趣召。紳綏改觀。頂踵知歸。中謝竊以潤色大猷。素極儒臣之選。奉承密旨。實專人傑之求。宋興百六十年於茲。壁誌三十三人而已。宮蓮跋燭。至空對於七春。仙嶺浮鼇。或稍遷於一紀。顧如名輩。猶遴此除。矧金鼎玉鉉之元臣。與鳳閣鸞臺之近弼。異時東閣。按武

四賢。雖才分之爾殊。信詞林之增耀。凡緊推擇。實係重輕。伏念臣久矣空
踈。蕭然疲緩。獨荷照臨之逮。見收隱約之中。入處嚴扉。南踰暮歲。震風凌
雨。仍漸再造之私。蟠地際天。尤幸千齡之遇。瓊籙面聞於要訣。琅函數授
於祕經。天動奎鉤。俯答蕪訶之韻。夜趨霄極。仰瞻颯馭之游。况大號之肆
敷。多一時之特召。三王就第五相策勲。定命錫符。均釐率土。合官布政。授
節。邇聯萬年天紀之復元。六路師干之奏凱。猥緣簡記。得竭鋪張。對揚每
近於清光。慰藉屢形於褒語。俾寬幽黜。遂冒寵陞。此蓋伏遇皇帝陛下。心
鑑冲融。道樞淵妙。因任原省。內獨運於乾剛。翁受敷施。外靡煩於師錫。載
加顯渥。用燕羈臣。惟聖學之川增。復睿文之天縱。第知刮膜。竊窺雲漢之
昭回。曾是嘔心。曷效雷風之鼓舞。所虞累國。豈敢愛身。獨肩論報之思。終
蹈損糜之節。臣無任。宋景文公集讓加承旨表。右臣。今月二十二日。閣
門。降到誥勅各一道。授臣翰林學士承旨。依前兼端明殿學士。翰林侍讀
學士者。聞命震驚。撫躬愧汗。伏念臣病求解郡。恩許還朝。獲便醫藥之良。
旨救桑榆之晚。是為再造。舉戴深仁。然自休偃於私居。尚苦纏綿於舊疾。
深虞盈滿。遂致顛隳。今茲詔除。尤出望外。且承密旨者。或膺疾召。或訪欲
謀法。從翠華之嚴。恭持紫橐之重。必資該敏。仰副眷求。如臣者。年事頽侵。

氣力衰耗。且責於必不能者。敗。加所不宜授者。僭實累公議。敗速身災。自知甚明。人言將至。伏望皇帝陛下。推雲戢霽。破鄙延光。許回誤思。少安危。困。誓堅九殞。歸謝鴻私。**劉行簡茗溪集**賀翰林承旨啓。伏審祗膺使命。召拜禁林。制書頒傳。士類鼓舞。竊以自古願治之主。將規遠圖。必有視草之臣。親承密命。豈特右文之事。實參戡難之謀。而况寓直北門。對揚浴殿。自開元之際。浸隆學士之名。逮章武之初。加寵內庭之老。禮秩增峻。事任匪輕。願非其人。不在此選。恭惟某官。養剛大之氣。足以有為。好深湛之思。欲其自得。風規邁往。論議有餘。上方訪忠孝於昔聞。知典刑之尚在。召從孤外。俾侍燕間。紬石室之書。既終信史。進玉堂之直。仍襲世官。謬云天子之私人。端是吾家之舊物。然而國是所屬。物論既孚。茲為大用之階。即副具瞻之望。某年餘無幾。仕乃為貧。自知偶世之闊疎。獨恨登門之婉婉。及茲贊喜。深切知歸。欣頌之私。名言罔既。**沈忠敏公集**賀馮承旨啓。伏審鋒車入覲。斧扆對揚。超玉筍之新班。冠金鑿之舊直。除音四出。歡頌一詞。竊以舉三代之遺英。而當號令文章之事。取四海之雋望。而摠言語侍從之官。此上所以篤於近臣。而世亦將期以大用。况夫親承密旨。獨望清光。地接六符之中階。秩高兩禁之上列。帝選于衆。公惟其人。恭惟某官。炳嶽

瀆之靈。盡東南之美。德量蓋存夫遠。大道術已造於純全。氣鬱九州。繇直
養而無害。才周萬事。殆曲成而不遺。忠既格於天淵。信亦行於蠻貊。晝膺
三接。歲閱九迂。詞掖代言。思若湧泉之決。儒官正席。化如時雨之施。騰聞
東序之絃歌。歸聽北扉之鈴索。方將摠尊主庇民之術。豈特煥經天緯地
之文。遽銜恤於倚廬。致興思於仄席。聿頒召節。仍趣賜環。天子虛懷。安問
鬼神之所以。都人拭目。復觀風采之凜然。迨出親除。式昭異數。定見金甌
之覆。即期玉鉉之登。德裕之文。用雖長於大手。吉甫既相。禮自絕於同僚。
斯言不誣。惟日以俟。某離竒弱質。公麼微生。頃蒙特達之知。曾乏先容之
助。側聞顯渥。倍激驩悰。久託範模。行費大鈞之塊。北僅同燕雀。更欣夏屋
之帡幪。代賀鄧承旨啓。伏審比自禁林。擢承帝旨。詔語甚渥。士論交
欣。伏惟懽慶。恭以某官。以高明之資。養剛大之氣。服膺忠孝。率自家傳。被
遇聖神。遂當世選。貳天官於中省。掌帝制於北門。毫端形容。海內傳誦。是
用冠內相之列。予以極儒者之榮。對越威顏。密承顧問。提鼇仙嶺。尚煩紬
繹於絲綸。翔鳳禁池。行見後先於伯仲。云云王漢濱先生集上孫承旨啓
光奉制書。復登翰苑。承中禁幾微之旨。冠內朝清切之班。傳聞四遐。聳動
群聽。竊以北門待詔。專取文章。東閣別居。必推年德。將相相望於前世。官

資不計於同僚。在中朝熙洽之時。特為榮遇。逮南渡艱難之後。無復常員。自非大用之資。曷副久虛之選。恭惟某官。斯文哲匠。當代耆英。踈通既稟。於天資。練達尤深。於世務。清塗揚歷。閱歲月於三朝。絕域征行。冒風霜於萬里。夷險不渝。於一節。身名由是以俱榮。入掌絲綸。出專斧鉞。詔令繼兩京之作。威權侔二陝之分。屬睿哲之求賢。思老成而共政。鋒車馳召。屢趣舍人之裝。黼座對揚。遂前天子之席。方今台階未備。政路多虛。濟時實藉於真才。注意允歸於舊德。名書案上。聞宸翰之新題。禮絕座中。有禁林之故事。某叨蒙慰薦。粗識依歸。峻比龍門。已濫登於賤跡。成同鸞廈。惟竊賀於私心。**宋景文公集**孫承旨啓。右某啓。伏承寵司憲府。歸冠禁林。榮躅雖紆。公言增仰。恭以某官。躬殆庶之彥。舍舍厚之和。內儲人文。外絢王度。比緣國賴。司直是故。選有難才。屈敦博之大儒。肅抨彈於列辟。純誠謖謖。露勁節於歲寒。烈譽稜稜。滿危言於天下。聊避僉錫。遽願回翔。知所以裁。雖為吾黨之幸。實相以濟。終副上帝之心。姑待剛辰。庸躋右弼。某久違穎文。方屬鞬橐。側聽恩言。但馳欣素。**楊承旨啓**。右某啓。伏承懇避。剝司歸冠。嚴署雖公。言弗歇。在賢槩當然。恭惟某官。外表人文。內函國器。白璧盈握。自謂可為。和鑿在前。動必中道。靡留先據之地。回趨不競之場。鎮息

浮囂保完冲素。其如締宇前席。益厚於眷存。得非金鉉虛中。有待為輕重。側聞騰報。尤副所欽。景仰萃中。墨翰奚述。與丁承旨啓。某啓。陪禮回謝賓客。偃卧日高。神明稍還。觀召孺子輩。飲酌於前。差足以樂。忽得和章。清粹閑放。同茲意好。作歸來之漸。則華髮從初服。自卜既審。終不使二疎笑人。恩思大言之出。乃狂人指目。則念平地有機。甯常日防繒弋矣。欲謀所處。惟山林無何有之鄉乎。况執事恬於退淡。僕安於拙附。退道不同而趨無異。他日之嵩雲頽月。果不屬他而主於我。決矣。因長言之惠。不覺及茲。戢之戢之。無為俗人言也。明日冀望眉宇。劉攽彭城集與王承旨啓。效智小邦。晞風右省。雖期會之事。幸免於沈迷。而繩墨之間。自慙於結約。思復侍侷之論。窺雍容之輝。眇如雲霄。倏更歲律。伏惟陟降帝側。綏養時中。恭以某官。德量淵深。神鋒穎擢。知當世之要務。自一時之偉人。經義精通。文采英發。贊天常於筆舌。明帝制于典謨。海內服其詞宗。主上許其國器。必且擢躋柄輔。代熙化工。推其不世之資。用格非常之業。僻守遠郡。有張敞繩墨之嗟。願為中郎。無汲黯禁闥之望。瞻仰當世之傑。侍從鈞天之游。邈焉雲漢之高。益歎泥滓之陋。伏惟燕見多暇。啓處用康。恭以某官。德貫道樞。學優聖奧。言必垂於士則。智悉諧於帝謨。於以經緯人文。贊

襄治體。譬猶玉衡平物。無釐毫之差。元龜告猷。絕幽深之阻。輿論斯久。休命焉歸。伏念託茲僻陋之邦。迷於期會之務。雖馳情而無極。曾奏記之非時。仰惟德宇之寬。深察小夫之智。幸未忘於曩顧。猶竊冀於兼容。隆暑在辰。燕見多暇。吉祥止止。啓處休休。恭以某官。性茂天機。學優聖域。處全德以耀世。振遠猷以致君。所謂元精之生。王者之佐。且中外之任。試諸難而已周。而文武之材。見於事而咸效。上方酌輿論之僉屬。峻寵章而奮庸。敢冀上為宗祧。精調寢饋。畢西臺先生集。上修史承旨啓。某頓首再拜承旨脩史侍讀年兄。近者舟御經從泗上。獲奏請謁。遂得款侍。誨言累日。感激慰幸。併集下情。氣序漸熱。共想還奉禁嚴以來。台候動止。萬福。某區區營職在外。實由芘賴。苟免於罪戾。初遠言侍。日夕馳戀。伏望順護。生經延集洪祉。就膺廊廟之拜。以慰中外。遠誠。惓惓之禱。不宣。某悚息再拜。官守淮甸。因緣幸會。得於道途際會。以望見顏色。非特大慰累年。闊別門下之情。而更蒙感念疇昔。欵以舊言。結戀依仰之私。雖寢食不忘。即日恭承大旆。到闕以來。陟降文石。日奉玉色。燕見之間。恩眷尤異。宜遂入輔熙辰。大快人望。竚聞除音之傳。別當馳賀。記室遞次。謹奉前啓。附承起居。兼布私誠。萬一伏惟台慈亮察。某惶恐啓。自拜違舟次之後。某遂離泗上。

途中遇濠倅林通直出所賜教意累幅詞札粲然尤體眷予之厚收置巾
楮其感無窮是時竊料方在中途故約大旆到闕而上此記今想新命匪
朝伊夕當繼奉竿牘以助在堂之慶伏惟台慈加察幸甚某再拜伏審
還長齧禁進讀經闈復緒正一朝大典舊物前効人固料其必然而或以
為未足請賀門下蓋知大任之在即為可賀也孤遠無似之人遂將從士
大夫之後想望賢業而永託帡幪之賜至幸至願元何大虛知非堂蒿賀
程承旨啓伏以辭榮丹陛尋隱紅泉漢庭尊跡傳之賢用成其美士流
羨歐公之退共仰其高展也偉人見於今日竊嘗觀功名之際罕有能始
終之全雖如唐虞三代之時無踰伊周二公之懿然當保衡之任則有營
桐之危居負辰之時不免徹桑之慮使其非望實在人之有素誠未知名
哲保身之何如是以霸越治吳遯動扁舟之興除秦感項即從赤松之遊
天下徒稱其知幾曾中所存豈易識不然叔季之希闊何為蹤跡之寂寥
借曰有之亦云未矣淵明之棄其職特不堪於督郵巨源之歸其鄉以既
老於司業校其去就彼哉重輕况於秦運之方隆可以遯肥而自詭此公
之事於世無倫共惟承旨相公雪樓先生閣下一代宗工四朝名德迪我
高后旁招俊乂之賢式是南邦遠有光華之被推權姦於方熾振臺綱而

益強。顯惟成宗。召彼故老。俾商中書之事。兼崇內相之班。宜為誥者。王某之文。可力史者。退之之責。鋪張堯舜。鑄二典三謨之辭。蹂躪漢唐。抗八索九丘之製。因選掄於鄂省。暫檢校於山房。陛下繼明。元臣彙進。虞庭十六相。亦惟汝諧。周衛一二臣。爰命公後。聲搖鰲頂。價重雞林。聖至尊之而不名。群公敬之而無間。道德如此其厚。節槩如此其高。文章如此其煒煌。名位如此其超卓。舉無不足。所欠者歸。帳飲都門。定有畫圖之跡。錦衣榮故里。允為邦家之光。中獨抱喜心。亟紬賀幅。車無下澤。馬無欵段。不漸足。蠶於奔馳。墨有黔川。筆有宣城。何憚手胝於模寫。誦言猶淺。倚德滋深。謹奉啓陳賀以聞。伏惟鈞慈。俯賜鑒在。謹啓。**蘇魏公集** 辭免承旨劄 臣今月三十日。准閣門告報。伏蒙聖慈。特授臣翰林學士承旨知制誥者。聞命震驚。不知所措。竊以學士之職。朝選甚高。非唯取文章翰墨之工。蓋亦有應對顧問之責。而况專承密命。首冠近班。寵待固異於常員。事任尤艱於虛授。伏念臣短材極陋。樸學甚迂。遭遇四朝。榮拔之私。叨塵六職。銓衡之任。歲月逾邁。齒髮已衰。居常閱簿。領之書。猶有不逮。將使司典冊之任。實謂非長。自省甚明。實難堪處。伏望皇帝陛下。太皇太后陛下。如天養物。以器使人。憫察丹誠。許還成命。庶安駑蹇之分。不孤覆燾之恩。臣無任祈天俟

命激切屏營之至。所有告命未敢祇受。**蘇文安公集**辭免除翰林學士承旨劄子。右臣准尚書省劄子。六月二十九日。三省同奉聖旨。除臣翰林學士承旨。日下供職者。臣聞命震驚。罔知所措。竊以翰苑設官。均為高選。而承旨之職。久虛不除。歷數中興以來。所授纔二三輩。自非鉅人長德。優有問望者。疇克臻此。仰惟陛下。勵精新政。汲汲求材。號召耆英。未聞進用。而臣嵬瑣無取。決辰之間。再叨誤命。循涯揣分。實所不遑。是敢干犯天威。罄竭愚悃。伏望聖慈。許臣只守舊職。追還成渙。改授實能。庶安孤蹤。不累親擢。所有恩命。臣未敢祇受。謹錄奉聞。伏候勅旨。**周益公大全集**三辭免兼翰林學士承旨劄子。臣近再具奏辭免兼翰林學士承旨。伏蒙聖慈。特降詔書不允。恩施隆重。踰於丘山。便當祇體聖意。何敢過為飾避。然臣竊念分直禁林。寔謂高選。服勤文字。乃其職業。若驟進久虛之位。仍加優逸之禮。恐雖宿儒舊德。不敢偃然當此。臣是何人。輒尔冒居。蹤陛下寵遇微臣。在公論必不容恕。而况經筵史觀。東宮僚屬。比之同列。兼職已多。伏望聖慈。察其情不自安。懼速顛沛。特賜矜憫。許免上件恩命。臣誓竭犬馬之力。圖報天造。取進止。十一月九日。三省同奉聖旨。依已降詔不允。辭免吏部尚書兼翰林學士承旨奏狀。寵光下集。感懼中深。切以文部設

官。卿列三銓之首。禁林分職。命尊一老之承。諒非望實之交乎。安得恩榮之並受。如臣者。性資昏鈍。問學荒蕪。綿力薄材。事業每居於人後。高官厚祿。選除常在於衆先。分毫未答於殊知。積累更多於幸會。儀曹再至。禮文獲預於討論。翰苑重游。典冊屢參於潤色。已溢銜鑿之量。方隆天地之恩。外朝高南省之班。內直冠北扉之秩。求閑而剝。既難強於精神。宜退而迂。亦懼招於議論。思道貪饕之誚。寧干逋慢之誅。伏望皇帝陛下。明君知臣。慈父愛子。察臣吏才素短。詎應付之銓衡。憐臣筆力已衰。難復責之翰墨。收還異數。改畀實能。庶幾毛玠之清。可踰於魏。毋使鄭綯之密。獨見於唐。

翟忠惠先生集翰林承旨辭免狀 右臣今月初一日。準尚書省劄子貳道。奉聖旨。召臣趨赴行在。又奉聖旨。除臣翰林學士。又初七日。保義郎張濬。賫到劄子貳道。再奉聖旨。除臣翰林學士承旨。令臣乘遞馬疾速前來赴行在者。臣久淪裔土。忽奉召音。義當不俟駕行。即時奔命。伏念臣昨緣犬馬之疾。致仕已涉四年。久為廢人。無復生理。今者遠蒙君父之記錄。驟拜前後之詔除。仰貪恩榮。豈不願進。顧難強者。老朽之筋力。所自恨者。已廢之餘生。敢祈聖聰。重賜骸骨。伏况臣仰祿為活。口衆食貧。苟非被病之有年。孰肯謝事而辭祿。年齒逾邁。病勢益加。伏望聖慈。察臣前者累懇乞

身具存奏牘。非緣今日始聞召命。乃敢固辭。欲乞特賜旨揮。許臣依前致仕將理者。謹錄奏聞。伏候勅旨。**王初寮先生集**辭免翰林學士承旨奏狀

臣今日。準東上閣門告報。已降告命。除臣翰林學士承旨者。聞命震惶。罔知所措。竊以北門東閣。獨承密旨。職親地峻。實冠儒臣。惟時間出之才。乃稱非常之選。伏念臣樸拙昧陋。久于堙淪。親被聖知。躡置華近。起之既踣。恩厚不訾。數對清光。更蒙天獎。而大號令。大封拜。皆特命當制。臣之榮遇。蓋無前比。遂巡退避。猶恐弗勝。冒昧超踰。其必自殆。伏望聖慈。洞照危懇。追寢成命。止令仍舊待罪。詞禁庶安。愚分未速。顛躋所有。告命。臣未敢祇受。臣無任。**王珪華陽集**依御批授翰林承旨奏狀。治平四年九月。右臣適捧御批。已除卿承旨。命下便可祇授。蓋出朕意者。臣竊惟此職。朝廷素以待年德之臣。而臣名望素微。恐不足以進承密旨。首班近臣。方欲削章陳避。而蒙陛下過賜敦諭。臣何勝聖眷之隆。來日便於閣門承命。**國朝****王廉文山集**送蒙古翰林院承旨慶童公序。昔唐太宗既定天下。乃詔虞褚各以本官兼宏文館學士。稽古右文。游精太平。以建唐家之丕基。今天下航浮索引之國。罔不臣服。民不知兵。垂八十年。可謂盛矣。然武備廢弛。土臣日嬉。海內繹騷。天子亟下哀痛詔。以赦過宥罪。賊負固逆命。蔓

衍滋甚。天子震怒。分兵四出。於是慶童公用命拜江浙行中書省平章政事。統諸道兵。公深沉有大度。坐鎮雅俗。大議擬大設施。咸處置得宜。東人倚之為金城焉。居數歲。天子以公久暴露於外。乃召入為蒙古翰林院承旨。以備顧問。東人以公是行也。適與虞褚輩遇太宗。時同事更相慶賀。欲留之不得。乃作歌詩以送之。布衣士王廉謂諸東人曰。今天子受命於穆清靜。公以不世出之材以佐乎其下。他日事業。豈但虞褚而已。然今日之務。尤在乎力天下之農。勁天下之兵。不使市估厭泉弊。不使奸宄塞賢路。不使賞罰私功過。不使盜賊肆殘暴。能行斯六者。天下之事過半矣。東人果誦予言於承旨公。則天下幸甚。宋韓魏公安陽集次韻荅承旨王端明禁扃清切擬仙都。多病年年絕塞居。四海風雷歸舊筆。二陸霜霰乃吾廬。道同今古猶相照。事後鱗鴻不計踈。莫謂安恬遂留滯。是非終有史臣書。蘇魏公集酬鄧承旨 召節來從蜀道西。遺思人尚襍青泥。禁中手筆由裁制。天下英雄在挈攜。公屢試多士及知貢舉。密議金鑾應有記。韓偓承旨有金鑾密記。登庸石刻竚重題。元稹為承旨學士。作題名記。云十七年中。在是職者一十人。而九人參大政。次年稹亦入拜。綸闈盛宴仙黿會。飛集翩翩五鳳齊。是集內外制五人。宋景文詩集慶歷初。召為學士。歲餘罷。

久之出守凡三十年。還拜承旨。感而成詠。十八年前玷玉堂。當時綠髮此
蒼蒼。傷禽從奮愁。瘡重。廐馬雖還笑齒長。晉侯戲首息曰。屈產之齒長矣。
薰罷山爐飄暗燼。瀨餘銅椀冰去寒漿。須慙清切鑿坡地。不是吾人得性
場。**許綸涉齋集**上周尚書內翰承旨二十韻。弱水蓬萊遠。群山岱嶽高。
塵埃千障隔。景行寸心勞。摸索知何自。樞趨苦未遭。銅章披宿霧。藻鑿炳
秋毫。穹壤懸鵬鷁。篇章抵鴈羔。斯文標正脉。輿論凜時髦。勇退關吾道。留
行切帝褒。風雲開壯觀。舟楫際洪濤。諫履昭魁象。詞瀾卷巨鰲。合宮陳縟
典。華蓋粲星旄。霽日明黃道。祥風動赭袍。恩波縈救草。顏咫尺。醉仙桃。麻冊
追盤誥。詩歌遍頌騷。人方期補袞。功豈在揮毫。地禁承中旨。天官冠列曹。
儀刑喜頗牧。步武接夔臯。蚤晚登三事。乾坤倚一陶。途長須驥足。用拙匪
牛刀。造請神先索。推敲養莫搔。未嗟聞道晚。終待郢斤操。**元陳剛中觀光**
集呈承旨忠齋留公以樂只君子遐不眉壽為韻。太極生乾坤。萬化一
索籥。孰為萬化宗。天其付先覺。偉哉百世士。逸響振木鐸。深衣花木間。清
風貌獨樂。皇皇六合間。不朽惟此理。至人妙氣機。乃見混沌始。春風七
十年。鶴髮映齟齒。誰知玉雪胷。千載矢天只。公昔坐黃閣。玉鉉宣殊勳。
今居石渠署。袖手看浮雲。出處固有意。豈令俗子聞。但存方寸丹。期以酬

明君。聖明握龍御。六合混文軌。麟閣有老臣。國脉良在是。我我太華山。浩浩黃河水。寂寂百年間。今見歐陽子。仙人白玉闕。踏月戲紫霞。坐閱

東海水。秋風捲塵沙。爛柯亦偶爾。人世驚咨嗟。龍漢劫運長。誰能測幽遐。

蓬萊在何許。縹緲煙濤浮。飛仙駕颺輪。徑踞金鰲頭。手攜五色筆。遊戲

三千秋。回語枋榆鷄。識此逍遙否。小草有臭味。願附青松枝。况我三世

間。受此雨露滋。家庭有勝事。陶冶非公私。稽首拜床下。喜色津鬚眉。神

京三月春。光風滿宇宙。曉視紫薇庭。寶煙篆金獸。豈無魯侯詩。昌熾今猶

舊。願泛玻璃卮。起舞為公壽。史館暮春有感。呈承旨野莊公。滿篋詩章

未得傳。微官束縛正堪怜。靡蕪滿院又三月。首簪堆盤無一錢。洛邑家書

黃犬上。巴山舊業子規前。夜聽兒女青燈話。似覺朱顏老去年。**王文忠公**

集借谷張編修韻呈廉承旨。猛虎蹈檻弄狡兔。罹罟網詎知冥冥鴻。層

霄渺遐想。巍然光群辟。四海勞景仰。皎皎報國舉。直錯諸枉。兩宮眷方隆。

莫厭三公養。我家唐溪上。茅屋粗可居。雖無千木奴。瓜圃連芋區。野老

時共席。商論種樹書。田里樂優游。名場謝馳驅。裁成付公等。海宇恒晏如。

結髮事鉛槧。謬負經綸志。夙心初未忘。用舍有時義。盛時事方殷。臺閣

擢能吏。君侯念桑梓。惓惓不遐棄。知我浩然歸。應動涓陽思。千金鬻駿

骨。騏驎爭歸燕。昭王國已墟。盛事傳千年。物外有高人。揮手蒼崖顛。笑我好竒服。楚楚自裹纏。有酒第可飲。且莫分愚賢。復借前韻。溪邊燕爭泥。簷隙蛛結網。紛紜勞日夕。此外無餘想。穀穀林間鳩。守拙吾所仰。威鳳棲丹穴。軼駕不容枉。梧桐生高崗。抱瓮勤溉養。五王誅兩兇。士民各安居。三思偶漏網。反墮豺虎區。展卷不能讀。歎息為廢書。處事戒姑息。用斷當疾驅。眼看前車覆。來者當何如。幼承父師訓。卓然樹微志。遊心惟詩書。躬行迺仁義。古來為已學。非止儒飾吏。時情迂白圭。區區敢衆棄。特立天壤間。千載有深思。仙人馭蒼鸞。莫楚朝幽燕。下視萬虵蟊。擾擾知幾年。散髮沐咸池。言旋崑崙巔。夢中授寶訣。一洗世糾纏。再拜謝嘉惠。但愧非高賢。次廉承旨韻四首。齊門鼓瑤瑟。郢地歌陽春。豈伊和者衆。棄之若埃塵。哀絲間豪竹。哇淫日爭新。流傳亦已久。居然喪天真。鍾期不可作。吾將與斯人。玉樹照廉泉。草木含芳春。我冠立中朝。群賢仰光塵。世德久已隆。寵渥今尤新。後樂紹先志。經綸迺儒真。行看翔鳳池。綏我區中人。相門有君子。玉德溫如春。賓筵仰芝眉。浣我胷中塵。公憐臭味同。我樂相知新。未識心已降。一見情更真。但慚衡門士。因彼青雲人。青松凌歲寒。天華媚芳春。結根各有所。貞脆隔幾塵。容容夸毗子。采采衣裳新。譚譚昧

遠大。硜硜匪真真。落落四方志。悠悠千載人。陳秋岩詩。酒病姚承旨見訪。酒病不可解。清涎吐滿床。友勤加飯勸。醫獻養生方。雪屋吟詩懶。春爐煮藥香。了無名利想。靜坐養神光。貢泰父閩南集上劉承旨二首。大魚化溟海。微禽變淮波。我生亦何為。感物常悲歌。念茲秋蘭華。含榮在山阿。孤貞固自信。採掇將誰過。安得紉佩服。襲此芳馨和。泰山不辭壤。河海不擇流。所以經世者。賢才務旁搜。我願為黍稷。得植君田疇。我願為壘洗。得奉君獻酬。慎莫令棄置。被褐居林丘。蕭勤齋集寄廉承旨。嗟余晚聞道。寡昧莫與儔。學農且無成。而敢玷士流。下問脫有人。披簡副所求。何以佐司成。將貽君子羞。吳澄支言集別閩承旨贈篇題欲舊。飛剡墨方新。邂逅百五。睽違十六春。朝廷須老手。館閣著閑身。歲歲山中望。文星麗紫宸。王暉秋澗集贈承旨唐壽卿。論士須諧實。相馬先其神。周秦何貴賤。變化存吾身。唐侯金閨彥。動有鸞鳳馴。飄飄瀚海翮。上拂明月輪。憶初識君面。轉盼二十春。竭來客京師。君為玉堂臣。時於管中窺。班班見其文。高適四十詩。便與作者隣。青紅桃李場。天葩散奇芬。有德諒有言。君侯性閭閻。最愛發策際。不迫意獨臻。理明中事機。士氣借以氤。重念朋友交。敬毅多不倫。或者一顰笑。意在交相因。令人氣最短。標置分畦畛。愛君略城府。吐

詞爛天真。不作崖異舉。不學游說秦。信厚等麟趾。為人解絲棼。所以多士
間。堂堂張吾軍。蹇予自結髮。汎愛而親仁。當其立事歲。亦復求蠖伸。長風
萬里浪。蹭蹬無蹤鱗。今雖老伏櫪。尚友心猶振。都城交游海。因依幾當親。
如君辱識久。辨與陪翔麟。人事有乖合。對面如離群。徒從尊俎間。一笑傾
冠巾。只今友道衰。耐久將何人。相馬論其力。取友非所樽。天機到沒滅。君
今九方歎。心期既有在。形迹不必云。因題樂山詠。聊書代吾勲。**虞道園學**

古錄寄忽承旨

投老清江外。依山結數椽。扶藜循水竹。把筆賦雲煙。歲
熟無憂食。秋清不礙眠。故人相望遠。北極在天邊。**國朝周巽泉性情集**

奉贄歐陽承旨圭齋於書臺揚青城宅。時公來叅族譜衡嶽降神日。玉堂
承詔時。神仙中人物。鸞鳳上丰姿。黼黻袞龍著。文章天馬奇。日邊辭玉體。
岩下採金芝。來續廬陵譜。兼題六一祠。書臺見顏色。翰墨灑淋漓。雲遠清
湘樹。心懷丹鳳墀。停盃操別鶴。一鴈過天涯。**何太虛知非堂藁**寄程承旨
元凱同嚴召。留班錫異恩。聖神思治切。宗社有公存。地立鼇峰峻。天依
鳳闕尊。咎夔侔道合。旦奭共心論。妙幹時雍化。丕揚祖烈敦。堯文嚴大典。
虞采倚昌言。卦氣丹凝鼎。星符紫照垣。竒齡歸碩德。寶曆肇皇元。花竹蕃
三谷。雲霞煥九門。相望清晝永。朝下酒盈樽。**馬清泉需庵集**上唐承旨

山城困卧嗟癯儒。杜門不出真潜夫。年來底事走京都。九衢塵土盈襟裾。
欲去不去果何意。勉度朝夕如有需。王侯將相可屈指。高堂席地皆氍毹。
悠悠萬事寧復理。左貪右取誇良圖。惜哉麟鳳不世出。凌雲燕雀誰能拘。
四海蒼生望安石。安石不起將何如。置之散地奉朝請。一身進退何舒徐。
長松百尺卧雲壑。桃紅李白羞僕奴。袖中自有南風手。太古遺音聊自娛。
括囊無咎亦無譽。請君善保七尺軀。一壺千金俟他日。清風靈雨散八區。
鄙人不達世俗事。作詩來獻非徒諛。**吳克恭詩**送張夢臣中承拜官翰林
承旨。中丞獻納道如何。內相絲綸寵莫過。槐閣地連文石陛。杏園春滿
曲江波。陰陰雨露深青瑣。箇箇星辰濕絳河。花蓋隔簾宮漏近。柳條當戶
曉鶯多。中官送酒青絲絡。上苑乘驄白玉珂。豈獨寸心圖補報。要須元首
及賡歌。太常禮樂還相問。閣老才名迥不磨。通國此時同悵望。憶公何處
是委蛇。鰲峯巨石森蓬島。香殿微風拂御羅。延祐得賢俱第一。野人白首
介林阿。**元僧盤谷遊山詩**訪翰林承旨盧處道鑾江荆識過蕪城。聞整琴
書上玉京。范甲曾吞雲澤闊。郢斤手握鳳樓輕。日當楓陛全光照。月轉霜
臺影倍清。將見載賡歌一曲。盡翻垂拱入新聲。訪翰林承旨張疇齋
記得灤江登仞墻。黃花五見吐秋香。騷壇不譴雲泥翼。抹月批風笑一場。

王道士竹林清風集美閩承旨 海底珊瑚明月璫。出為國瑞固難量。文

章能事間重譯。雨露深仁及遠方。六合八荒春浩蕩。百家諸子海蒼茫。淮

王門下孫登客。還許升堂近耿光。王景初蘭軒集寄閩承旨 陋室神光

照夜時。錦囊初得寄來詩。英靈間氣山川在。造化春心草木知。臺築黃金

人自遠。鏡垂華髮老誰欺。白雲咫尺西溪路。回首龍門舉步遲。又賀閩

承旨 白玉堂前第一仙。手提星斗步青天。銀河泛入銀槎穩。玉斧脩成

寶月圓。翰職陡從今日重。才名誰似我公全。山人懶作彈冠夢。獨為斯文

喜不眠。陳秋岩詩答留承旨 東風相送恨綿綿。歌斷陽關緩着鞭。四海交

游今已矣。幾回離別各淒然。鷗邊保社期他日。馬上光陰惜壯年。記得向

來同夜直。玉堂斜月散金蓮。張西岩詩寄留承旨申齋 上到鰲峯最上

時。依然精力不曾衰。小車應召詢時事。大筆承恩草制詞。前輩諸公誰健

在。斯文一綫要維持。風姿祇是柯山叟。昨夢分明見奕碁。宋黃裳演山集

訪鄧承旨不值 一榻清風勞輾轉。八甑閒日想徘徊。不須笑貌方相識。

妙響還聞大似雷。國朝僧無詰蘭雪軒集贈圭齋承旨二首 天上歸

來太史公。江南投老釣絲風。校書盡啓三金匱。賜几頻扶兩玉童。芝草石

田春自綠。芙蓉丹鼎日初紅。自憐方廣天台客。也入毗耶丈室中。少日

相期汗漫游。羽人相望隔丹丘。上書未得同憎子。覓句徒勞擬貫休。松栢
薦蘿終有托。梧桐鸞鳳亦相求。永懷海內霜華老。又泛山陰雪夜舟。國

朝僧泐季潭詩

送宋承旨歸金華

當代文章伯。朝廷制作新。儲宮賢少

傳。開國老詞臣。際遇超今古。優容異等倫。莫歸蓮作炬。前席錦為茵。班固
才尤膽。楊雄語大醇。一麟生治世。長劍倚秋旻。仲子金閨彥。佳孫玉樹春。
尋常勞聖眷。七十解朝紳。戀闕行猶緩。還家樂更真。都門開祖帳。田里候
征輪。未覺鄉音改。其如此志伸。淨名應杜口。善惠必觀身。婺女星辰逼。羅
山雨露均。挑燈書細字。置酒洽比隣。白石求真侶。青松結社人。無心誠契
理。有道足怡神。自愧非支遁。空知讓許詢。三生情是夢。十載法為親。別去
投青簡。秋來覲紫宸。涼風吹彩鷁。携手大江濱。**清江貝廷臣詩**送詹同文
承旨還鄉 奉天殿下親承詔。老著黃冠出紫薇。萬里雲霄雙鶴去。時內
苑縱二鶴。九江風浪一帆歸。春前載酒黃泥坂。月下吹簫赤壁磯。文采昭
回看帝製。山中草木盡光輝。**宋劉龍洲詞**沁園春 寄辛承旨斗酒坵肩風
雨。渡江豈不快哉。被香山居士。約林和靜。與坡仙老。駕勒吾回。坡謂西湖
正如西子。濃沫淡粧。臨照臺。二公者。皆掉頭不顧。只管傳盃。白言天竺
去來。圖畫裏。崢嶸樓閣開。愛縱橫二澗。東西水遶。兩山南北。高下雲堆。逋

曰不然。踈影橫斜。暗香浮動。不若孤山先訪梅。須晴去訪稼軒未晚。且此徘徊。**元程雪樓集**木蘭花慢詞。錢雪樓承旨南歸。聖恩天廣大。容此老老江南。甚玉雪無瑕。樓臺有地。超出塵凡。此行錦袍玉帶。向紫微垣裏。寄官銜。聞道鄉間童稚。安排竹馬青衫。聲名要與二疎叅。千古入清談。看雲擁千官。沙堤一道。駐馬停驂。都門兩行楊柳。比尋常翠色碧於藍。不為東風吹發。猶能挽住征帆。**元張養浩雲莊集**唐承旨哀詞。往游故辯章靜德康公門。聞翰林承旨學士唐公德若望籍甚。蓋二公道合氣同。蔚為當代名勝。士被接納。有不翅龍門登而萬戶封者。走時年二十有四。一見畧齒爵禮。夷賓主。其引重後學。不獨於余然。大德四年夏四月。靜德公卒。明年秋八月。唐公卒。嗚呼。何天不福斯文。使二賢相繼去世。亟耶。維公姿宇魁秀。襟量豁如。始仕。人以宰輔期之。歷官右司郎中。工部尚書。翰林學士承旨。政聲風節。表表一時。其家居琴書左右。泊然與白屋士埒。事母孝。與朋友義。以誠。雖稠人廣坐。從容應酬。靡不心沃。尤活於權勢。人有幼而相好。長登台鼎者。數相過。亦不一造門以荅。閑處數年。終不以進取槩懷。然議者恒以不膺柄用為恨。走嘗傳聞公長右司時。或告中書誤釋一囚。世祖怒。趣宰屬詰之。吏抱按不知所出。遂告急公。初公以疾在告。未嘗署其

按公即援筆補之。行且曰。不誤毋恐。入見具本末敷奏。天威遂霽。後吏白於庭。中外嗟異。迄今以為盛談。嗚呼。人固有一言可見平生大節。亦有坐一事軒輊。終身不克伸者。是殆難以幸不幸論也。今人疾吏弊。防欺如鬼讎。案具求署。筆靳靳不肯下。駁至再至三。虞從連已。故為淡墨。際紙細書。異日久漫滅。不可復識認。又有值敗取按爪其畫者。政使無悞。且迎合附會。曲為之徵。矧肯明其誣。代其辨。復補署其銜者哉。蓋嘗跡是論公。使其進登廊廟。其不為公孫弘之阿旨詭隨。蘇味道之模稜兩端也。審矣。古人謂細事如此。大亦宜然。惜乎天不俾余言之效於世也。公諱仁祖。字壽卿。畏吾人。其履歷之詳。見叅議瓠山王公墓誌。詞曰。穹壤間。正大氣。生才發於德。苟非其人。巧求襲取。亦弗克。於鑠我公。量宏學博。德崇積。蒞仕卓然。人謂他年秉鈞。必歷三顯官。身同寒士。見冰蘖。下交不瀆。應酬雍容。儀靡忒。彼貴而頗。見且逃之。矧肯即。或舍或庸。略不介懷。惟自得。曩長西曹。代吏辨誣義。形色冒厥雷霆。一語回天。汗群辟。有美如斯。遐不以年止半百。使大厥施。淳俗可還。今可革。謂天漠如。倒糗畀人。曾弗惜。謂天皦如。溪獨於賢。乃爾嗇。厥理孰。凡非始。今焉來自昔。我挽以詞。九京之憾。庶少釋。

永樂大典卷之一萬一百十五

永樂大典卷之一萬一百十五

--	--	--	--	--	--	--	--

永樂大典卷之一萬一百十六

二紙

旨

樞密都副承旨

文獻通考五代有承旨副承旨以諸衛將軍充魏仁浦為樞密副承旨周祖問屯兵

之數及將校名氏令取簿參視之仁浦曰臣悉能記之遂口占以對無一差誤宋太平興國中以楊守一充都承旨都承旨自守一始也是時都承旨副承旨多用士人真宗後稍稍遂用吏人歐陽脩建言請復舊制不克行熙寧二年始以東上閣門使李評為樞密都承旨李綬為之副不用院吏而更用士人自評始也續會要初評受命文潞公為樞使以舊制見不為禮評訴於上命檢故事不獲乃詔都承旨副承旨見樞密使副並如閣門使禮熙寧五年以尚書比部員外郎集賢校理同修起居注曾孝寬為起居舍人充史館修撰兼都承旨先是或用士人亦止於右職中選用文館兼領自孝寬始也元豐三年用張誠一為客省使都承旨自是都承復用武臣元祐中復以文臣帶待制充都承旨哲宗職官志至崇寧以後則

永樂大典卷之一萬一百十六

專用武臣矣。四朝志。紹興二年。權禮部侍郎趙子畫充徽猷閣待制。密院都承旨。自改官制後。除文臣自子畫始。中興系年錄。建炎四年。高宗在會稽。以武臣辛宗道為都承旨。頗用事。紹興元年十二月。辛宗道既免。乃詔依元祐職制。置都承旨一員。並差兩制為之。然但聞一二人而已。淳熙中。王杓久用事。孝宗惡焉。遂復用士人。宋會要。五代樞密有承旨。以諸衛將軍充。國朝始有樞密都承旨副承旨。又別置諸房副承旨也。宋史百官志。副都承旨。掌承宣旨命。通領院務。若便殿侍立。閱試禁衛兵校。則隨事敷奏。承所得旨。以授有司。蕃國入見。亦如之。檢察主事以下功過。及遷補之事。都承旨。舊用院吏遞遷。熙寧三年。始以東上閣門使李評為之。又以皇城使李綬為之副。更用士人自評綬始。是月。詔都承旨見樞密使副。如閣門使禮。五年。以同脩起居注曾孝寬兼都承旨。參用儒臣自孝寬始。元豐四年。客省使張誠一為都承旨。復用武臣自誠一始。元祐初。復以文臣為都承旨。其後以待制充。元符三年。王師約為都承旨。左司諫陳瓘言。神考以文臣為都承旨。其副則參求外戚武臣之可用者。今師約未歷邊任。擢置樞屬。據文臣之位。甚非神考設官之意。至崇寧以後。專用武臣。建炎四年。高宗在會稽。以武臣辛宗道為都承旨。頗用事。紹興元年。道宗既免。乃

詔依元祐職制都承旨以兩制為之如未曾任侍從之人即依權侍郎法
又或加學士待制修撰貼職乾道初再用武臣自張詠始淳熙九年都承
旨復用士人自蕭燧始副都承旨文武通除樞密副承旨一員帶御器
械四員承旨選橫行充與從官都承旨同侍殿中分傳密旨為武臣之清
要御帶分直禁庭內宿直舍在崇政殿門內職居嚴邃多任國戚及內侍
兩省押班亦兼領或有邊功優異間除外官就領兵職於三路為武臣之
榮遇也元豐改官制後常用武臣張承一為承旨自後都承旨間用武臣
云宋胡寅斐然集郭執中樞密都承旨制朕以世讎未復軍政是脩既
任大臣分典內樞之地乃選良士入參宥密之聯俾幾務之與聞實嘉謀
之有賴久虛厥位必惟其人具官某氣果而才通識明而論辨蚤周旋於
塞上更事已多晚諮議於軍中臨機輒應挺忠誠而自竭當勤勩而罔辭
其次對於西清以近承於中旨尚詢黃髮勿云旅力之愆益罄丹心思佐
戎衣之烈鄭獬鄭溪集樞密承旨左監門衛將軍任承睿可樞密都承旨
制朕舉天下之機事統之西府而諸曹就列必有屬長以奉乎旨命以
汝持身蒞職稱為廉敏殆歷三朝至于耆艾閱其勞舊宜有以序遷褒寵
之澤爾其祗服無怠可汪藻浮溪集樞密院主事王露可兵房副承旨制

爾以材能服勞樞省考其閥閱當以次遷往懋厥官無忘報稱曾文清
公文集范純禮復天章閣待制樞密都承旨制 樞密之地選用士人宣
納密命自神考始肆予纂服收拔端良寘諸左右蓋遵先志具官范純禮
夷易有守篤實無華恂恂自持言行相顧失職茲久秉心不移起分州符
未厭輿議其還延閣侍從之遽來贊右府訐謨之微副予咨求矧爾忠益
著齋微垣類藁試尚書戶部侍郎兼總領湖廣江西京西財賦湖北京西
軍馬錢糧岳珂特授寶謨閣直學士樞密都承旨制 粵惟言語侍從之
臣久勞于外欲備錢穀甲兵之問式遄其歸肆庸嚴直於窮班而使親承
於密命用頒明綍庸示殊恩具官某學博而該詞麗以則逢逢惟柞蔚其
祖幹之枝裳裳者華潛矣孫芸之葉自世選爾勞而昭獎皆官修其業以
靖恭江淮財賦之淵作十三載荆楚衿喉之地餉百萬師刃游於批大郤
之餘噐別於遇盤根之際擢以邃清之秘職位諸宣納之要司召不俟駕
而行趣承東注賢不待次而舉嗣聽登崇 樞密院檢詳諸房公事兼權
右司郎中趙崇賀特授軍噐監兼樞密副都承旨 予方注意於內修外
攘故內以宥地之務為先外以武庫之備為急必惟其人乃共二事爾為
帝宗駒廉而不剝明而不察用使為東西府掾彌綸省務科瑣邊條動適

機宜。號稱周密。肆庸命典戎監導。旨樞庭。爾其討軍實而申倣之。以輔予
修攘之政。往祇譽命。益務蠲烝。周麟之陵。集陳正同。除敷文閣待制。樞密
院都承旨。右府本兵之地。惟長貳總秉諸事。為朕腹心。若時屬僚。寄委
咸重。奉承密命。必用從臣。闕而不除。十數年于茲矣。朕今得世濟之彥。拔
其才而用之。具官某。直亮多聞。得於家學。持論据正。亦克似之。賜環來歸。
既陟汝于禁路。兼寓幾省。罔不惟職業之思。朕方橐弓戢戈。以常德立武
事。如爾明睿。允宜在廷。內閣陞華。鴻樞稟務。併以授汝。往其欽哉。劉後村
集陳鑄除祕閣修撰樞密副都承旨制。自改官制以來。導旨官不必備。
顧今甲兵之問。猶至廟堂。科瑣日不暇給。然則都副並置。亦集思廣益之
義。爾明而恕。故論主正平。介而通。故事無凝滯。歷仕東西二府。與聞軍國
大議。親密於州。平幼宰彌綸之義。弘矣。索虜垂盡。侵疆來歸。朕欲及閑暇
之時。講修攘之政。爾雖已列九卿。其以論撰亞太尉掾。蓋時惟侍立可咨
訪。邊機惟同堂合席。可籌度也。方將引爾自近。繼有殊擢。可洪文安公集
右武大夫成州團練使廖虞弼除樞密副都承旨制。樞庭分屬。副承密
命。武著之高選也。朕未嘗輕以授人。曠位不除。蓋十餘年。今始得之。其官
某。氣略自將。濟之以敏。四臨遠郡。習知邊瑣。而安靖之政。達於朕聽。茲命

爾入侍殿陛。與聞幾微。往惟兢。以稱所蒙。許應龍東澗集。趙以夫除直
煥章閣樞密副都承旨。右府本兵之地。事機貴密。宣納之任。要在得人。
以爾才周世用。望重宗英。使節州麾。所至可紀。郎省卿寺。無施不宜。况荐
更宰掾之司。尤善贊廟謨之運。陞華邃閣。導旨樞庭。益究遠猶。以需顯用。
周南仲山房集太府卿樞密副都承旨制。朕惟右府之屬。莫如密命之
親。以次對而贊訃謨。豈惟舊制。用列卿而為副介。未有前聞。屬圖又以雋
功。固難拘於常比。爾才能鮮儷。慷慨自將。護漕日畿。已登最課。尹民天府。
綽有能聲。偉兵畧之深知。方軍書之旁午。爰躋榮於農扈。俾稟務於幾廷。
夫帝王之道。出於萬全。毫釐之差。謬以千里。其協承於幾急。必審當於事
情。服我優恩。嗣有明陟。**元豐懷遇集**四方館使康州刺史曹誦。可依前官
充樞密副都承旨制。勅。陟降軒墀。奉承密命。屬在幾政。實維親臣。具官
某。夙以材能。致于休顯。試之服采。蔚有聲稱。顧疇厥宜。無易茲選。惟純惟
茲。時則汝嘉。可慕**容彥逢摛文堂集**四方館使榮州刺史樞密副都承旨
朱孝孫。可正任防禦使。依前樞密都承旨。勅。朕明發不寐。有懷哲宗。推
原同氣之恩。申錫外家之寵。具官某。操脩端靜。識慮詳明。欽成之親。爾為
近屬。宜加進擢。俾領使華。正兵防之顯名。仍樞筦之舊職。與承密命。秩峻

地親。惟時褒榮。往其祗服。可。賈德明任承睿可都承旨制。勅具官某等。樞宥之府。所承稟而宣行者。皆禁密之命。必求謹厚之材。乃可備於陪屬。以爾等有恪愿之資。加肅給之敏。麗名機務。實唯勞舊。按其資歷。擢揔綱領。勉思勤畫。尚副褒寵。蘇魏公集。樞密院兵房主事李景先可吏房副承旨勅。具官某。宥密之嚴。地均公府。丞史之任。職專吏門。雖曰次遷。尤為遴擇。以爾首公勤辦。在事謹廉。嘉積久於勤勞。當進聯於曹務。益宜欽慎。思對恩榮。可。蔡端明集。張繼渥承旨。勅某人。蚤以材敏。屬麗樞庭。積延歲月之勞。益敦夙夜之恪。進承旨命。特示寵榮。祗荷恩遷。愈罄誠志。劉元城盡言藁。謝寶文閣待制樞密都承旨表。臣某言。伏奉告命。授臣寶文閣待制樞密都承旨。仍改賜章服者。參斗極之要聯。加奎文之秘職。仍紆命服。入侍彤墀。并荷恩榮。靡容遜避。臣其中謝。切以鴻樞設屬。奉密旨。以致嚴明。主慎微。擇士人而竝用。兼綜疆陲之務。與聞帷幄之謀。宜得時髦。共經常武。伏念臣。稟資固陋。涉世迂踈。親逢景運之興。獲躡衆賢之後。讎書麟閣。初蒙二聖之知。掌諫鸞臺。旋玷七人之列。誓殫愚直。罔恤怨仇。慙無補衮之功。俄有負薪之疾。方圖致位。復俾代言。擢躋清切之班。是為殊渥。自視某蕪之學。安可冒居。力丐真祠。幸蒙俞旨。豈謂歷時之未久。

遽聆誤寵之荐加。既累貢於忱辭。敢再叨於成命。已裁奏牘。必踐前言。忽被制函。易寘樞莞。雖需章之疊上。終渙汗之莫回。黽勉奉承。啓居媿畏。伏遇太皇太后皇帝陛下。兼收片善。固任群材。憐臣昔困沉痾。而今則已瘳。誓臣昔避詞掖。而今則難受。未踰旬浹。繼忝詔除。臣敢不益勵操修。慎思職業。涓埃自効。少逃尸祿之譏。本末不渝。期盡立朝之節。臣無任鄭剛中
北山集謝除寶文閣直學士樞密都承旨表 久玷清曹。宜招大戾。遽移要地。仍冠華資。識睿獎之優隆。撫微躬而震越。中謝竊以國有二柄。古列鴻樞。事分五房。均承上制。爰自熙寧而後。始參用於士人。故茲承旨之員。或旁兼於史館。誠以斗極執化元之本。機廷為宥密之親。拱侍天墀。躬聆帝訓。宜求洵直。克用稟承。而况西清寶棟之崇。實仁廟宸章所祕。服是邃嚴之職。並為儒雅之流。兼以授人。誰宜蒙者。伏念臣性資愚下。學藝淺荒。觸事多艱。漸覺桑榆之向暮。戴恩甚重。常如山嶽之在巔。念從召用而來。誤被睠知之寵。超騰省戶。擢副臺端。觀祕書者。頃嘗一年。奉典禮者。今亦踰歲。率無善狀。可穆師言。荐拜鴻私。惟知感涕。此蓋伏遇皇帝陛下。照臨如日。覆冒法天。獨運乾剛。揔六師而並用。大修機政。開二府以兼收。圖回不世之功。盡革累年之弊。茲所選任。宜先俊良。夫何庸瑣之才。亦在訪咨。

之數。臣不周旋體國。恪檢持身。雖懼踈愚。無補樞機之密。誓磨頑頓。少酬造化之功。臣無任 辭免寶文閣直學士樞密都承旨劄子 五月八日。准

尚書省劄子。三劄同奉聖旨。除臣寶文閣直學士。樞密都承旨。聞命震驚。周知所措。臣切以侍郎分曹治事。其選高矣。而密承上旨者。其職為尤重。階官辨秩為等。品已貴矣。而陞華內閣者。其資為甚崇。兼以付之。則朝廷委用之意。蓋自可見。而臣稟資駑下。賦性愚蒙。怙恃已無。雖有一意事君之願。而筋力向暮。實懷十駕難及之憂。冒昧以居。愆尤將至。伏望聖慈。收還成命。別付時望。外穆師言。下安愚分。臣無任皇恐激切懇祈之至。謹錄奏聞。伏候勅旨。

劉元城盡言蒙論。范育除樞密都承旨不當狀。右臣竊聞朝廷除范育為

樞密都承旨。按育昨知河中。嘗有缺行。嬖人預事。干撓刑政。子弟失教。閨門不肅。醜聲顯著。流聞道路。君臣之間。不可言者。使育實負過人之才。義難終廢。猶當抑之散地。更加歲月。磨去瑕垢。漸次任用。或為公議所容。今育之學術智能。無以異眾。而前日之惡播在僉言。比方外除。已玷卿列。曾未席煖。擢寘宥密。臣恐修潔之士。耻與比肩。流蕩之徒。無所懲戒。甚非所以稱陛下旌別淑慝。長育人材之意。伏望聖慈。深賜省察。罷育新命。以允公議。辭寶文閣待制樞密都承旨狀。右臣今月初六日。准閣門告報。伏蒙聖恩。除臣寶

文閣待制樞密都承旨。仍賜紫金魚袋者。荐膺嘉惠。尤切震驚。伏念臣近被寵靈。進直西掖。方茲避免。未奉俞音。重忝詔除。陞華延閣。俾承密旨。仍賜服章。恩數便蕃。職事清近。願臣愚陋。何以克堪。伏望聖慈。洞鑒由衷之言。特輟行己之命。庶安私分。不累公朝。再辭樞密都承旨狀。右臣近嘗具奏。乞寢恩命。准尚書省劄子。奉聖旨不許辭免者。才微任重。私分難安。効薄食浮。公言可畏。實欲量能而受職。非敢苟異以沽名。兼臣有男。與同知樞密院韓公忠彥之女。頃從幼稚。嘗約婚姻。雖未行聘。問之儀。恐亦涉妨嫌之迹。輒傾至懇。再瀆天聰。願收渙汗之恩。垂許循牆之避。回謝除樞密都承旨啓。

右某啓。近奉誤恩。俾承密旨。辭不獲免。受以為漸。敢圖雅眷之隆。遠辱華綬之貺。褒稱溢美。期待過情。感媿兼深。名言曷諭。董霜傑先生集。代謝辛承旨啓。吳門假道。嘗奉懇勤之歡。臨汝分符。獲伸故舊之好。未修誠於記室。先惠問於征途。不敏懷漸。拜嘉知感。恭惟某官才兼文武。世有勲勞。每暗合於孫吳。蚤得聲於梁楚。當敵示縱擒之妙。籌筭無遺。賦詩有競病之工。風流可尚。行復雲中之守。益擣堂上之竒。願惟無似之蹤。尚冀包荒之賜。即諧良覲。預慰渴懷。劉公是先生集。永興到任謝宋承旨啓。右某啓。肅將命書。臨署吏牘。藐是空疎之質。寄以會繁之區。方地數千。連城累百。內修民社。

之政。外揔兵戎之機。僊俛事為。經營分表。力非其任。智不迨心。此蓋某官
雅懷并容。餘論推假。不遺三益之素。使就一麾之安。願恐非才。終無云補
異因德輝之及。猶有暮月之成。方阻披瞻。曷勝銘向。元陳剛中詩承旨樂
山唐公。八月十二日。宴于其第。以詩奉呈。聖代開皇極。恩波雨露沾。篤
生嵩嶽佐。載叶渭川占。社稷千齡會。衣冠五福兼。朱絃新律呂。黃石舊韜
鈴。德望三朝眷。儀刑四海瞻。摛詞追賈馬。勵學探羲炎。宇宙歸青眼。風雲
奮紫髯。議如唐陸贄。詩似晉陶潛。踐履剛而毅。精神智以恬。一區楊子宅。
萬軸鄴侯籤。山色秋凝壁。煙光晝捲簾。金鑾辭秉燭。玉鉉待調鹽。大匠規
模遠。宗工號令嚴。王臣躬蹇蹇。君子德謙謙。此日鳴朝鳳。清秋近夜蟾。瑤
簪環杖屨。寶墨出緗縑。北海賓長滿。東山妓未厭。車聲聞綉戶。花影舞朱
簷。樂幸追靈運。憂當後仲淹。願施經濟具。天下待鍼砭。承旨野莊董公。
殊勲清節。孚聞之縉紳。紀以八詩。盟府旂常策。世勲一門忠。孝氣凌雲
衣。冠盛事誰堪比。漢後元間萬石君。鐵馬長驅棧路高。捷旗飛渡大江
濤。漢南煙柳蓬婆雪。猶識團花舊戰袍。扈從破大理雲南。已未飛渡。為先
鋒。首奏捷功。手分恩露。活惇嫠。春滿棠陰。大有菴。二十年間如昨日。兒童
猶誦衛州碑。為衛州總管有惠政。郡人刻石誦德。正色篤行第一人。危言

耿耿聳朝紳。忠州不負平生學。曾為皇家去佞臣。盧世榮將改法。公正色折之。語遂塞黑豸冠。我栢署陰。誰知偃月蓄機深。九重堯舜明如日。獨照

生來鐵石心。鄭公已拜大司農。倏捧詞林詔墨濃。自是玉皇香案吏。仙班合領六鰲峯。不負朝廷七十年。樓臺無地榻蕭然。清名當與溫公並。

只欠河南二項田。萬卷青燈味道腴。苦心欲探魯鄒餘。朝回立馬天衢上。又典春衣買異書。宋蔡耕浩歌集。念奴嬌詞寄仙巖辛承旨。碧梧轉

影。正露冷天高。涼生襟袖。此夕清輝誰信道。夜色居然如晝。玉斧重脩寶奩初啓。萬里寒光透。將軍高會。翠鬟爭勸樽酒。遙想地近仙丘。碧山高

處。引手攀星斗。醉囑姮娥。惟但願月與佳人長久。羅覆銀鞍。雨拋金甲。羸得詩千首。掀髯一笑。此懷人解知否。殿前承旨

蘇易簡翰林志舊官名殿前承旨。武臣下列之稱。及蘇易簡拜學士承旨。太宗以稱混雜。改殿前承旨為三班借職。南廊承

旨 **馬明叟**實賓錄五代江南林仁肇。建陽人。兄仁翰為福州王延義內兒。謂之南廊承旨。臨濟宗旨 **寶僧**

傳洪覺範曰。汾陽昭禪師示眾曰。先聖云。一句語須具三玄。一玄中須具三要。阿那箇是三玄三要底句。快會取。好各自思量。還得穩當也未。古德

已前行脚。聞一箇因緣。未明中間。直下飲食無味。睡卧不安。火急決擇。豈將為小事。所以大覺老人為一大事。因緣出現於世。想計他從上來行脚。不為遊山翫水。看州府奢華。片衣口食。皆為聖心未通。所以驅馳行脚。決擇深奧。傳唱敷揚。博問先知。親近高德。蓋為續佛心燈。紹隆祖代。興崇聖種。接引後機。自利利他。不忘先迹。如今還有商量者麼。有即出來。大家商量。僧問如何是接初機底句。答曰。汝是行脚僧。又問如何是辨衲僧底句。答曰。西方日出卯。又問如何是正令行底句。答曰。千里持來呈舊面。又問如何是立乾坤底句。答曰。北俱盧州長粳米。食者無嗔亦無喜。師曰。只將此四轉語。驗天下衲僧。纔見汝出來。驗得了也。僧問如何是學人著力處。答曰。嘉州打大像。問如何是學人轉身處。答曰。陝府灌鐵牛。問如何是學人親切處。答曰。西河弄師子。師曰。若人會此三句。已辨三玄。更有三要語。在切須薦取。不是等閑與大眾頌。出曰。三玄三要事難分。得意忘言道。易親。一句明明該萬象。重陽九日菊花新。還會麼。恁麼會得。不是性躁。衲僧作麼生會好。又舉三玄語曰。汝還會三玄底時節麼。直須會取古人意旨。然後自心明去。便得通變自在。受用無窮。喚作自受用身。佛不從他教。便識得自家活計。所以南泉曰。王老師。十八上解作活計。僧便問古人十八

上解作活計。未審作箇什麼活計。答曰。兩隻水牯牛。雙角無欄棬。復云。若要於此明得去。直須得三玄旨趣。始得受用無礙。自家慶快。以暢平生。大丈夫漢。莫教自孤。觸事不通。彼無利濟。與汝一切頌。出曰。第一玄。法界廣無邊。森羅及萬象。總在鏡中圓。第二玄。釋尊問阿難。多聞隨事。答應器量。方圓第三玄。直出古皇前。四句百非外。問氏問豐干。師乃曰。者箇是三玄底頌。作麼生是三玄底旨趣。直教決擇分明。莫只與麼望空裏妄解。道我曾親近和尚來。與我說了脫空漫語。誑嚇他人。喫鐵棒有曰。莫言不道。又因採菊。謂衆曰。金華布地。玉蘂承天。杲日當空。乾坤朗耀。雲騰致雨露。結為霜。不傷物義。道將一句來。還有道德底麼。若道不得。眼中有屑。直須出却始得。所以風穴云。若立一塵。家國盛。野老顰蹙。不立一塵。家國喪亡。野老安貼。於此明得。闍梨無分。全是老僧。於此不明。老僧即是闍梨。闍梨與老僧亦能悟却天下人。亦能瞎却天下人。要知老僧與闍梨麼。拊其膝曰。者裏是闍梨。者裏是老僧。且問諸上座。老僧與闍梨是同是別。若道是同去。上座自上座。老僧自老僧。若道是別去。又道老僧即是闍梨。若能於此明得去。一句中有三玄三要。賓主歷然。平生事辦。參尋事畢。所以永嘉曰。粉骨碎身未足酬。一句了然超百億。又曰。臨濟兩堂首座。一日相見。齊下

喝。僧臨濟還有賓主也。無。答曰。賓主歷然。師作偈曰。兩堂首座總作家。其中道理有分拏。賓主歷然明似鏡。宗師為點眼中花。無盡居士謂余曰。汾陽臨濟五世之嫡孫。天下學者宗仰。觀其提綱渠渠。唯論三玄三要。今其法派皆以謂三玄三要。一期建立之語。無益於道。但於諸法不生異見。一切平常。即是祖意。其說是否。余曰。居士聞其說。曉然了解。寧復疑汾陽提綱乎。曰。吾固疑而未決也。余曰。此其三玄三要之所以說也。所言一句中具三玄。一玄中具三要。有玄有要者。一切衆生。熱惱海中。清涼寂滅法幢也。此幢之建。譬如塗毒之鼓。搥之則聞者皆死。唯遠聞者後死。若不橫死者。雖聞不死。臨濟無恙時。與化三聖。保壽定上座輩。聞而死者。今百餘年。猶有悟其旨者。即後死者也。而諸法派謂無益於道者。即不橫死者也。祖宗門風。壁立萬仞。而子孫畏之。喜行平易坦塗。此所謂法道陵夷也。譬如衣冠稱孔孟弟子。而毀易繫辭。三尺童子笑之。臨濟但曰。一句中具三玄。一玄中具三要。有玄有要而已。初未嘗目為句中玄。意中玄。體中玄也。古塔主者。悞認玄沙三句為三玄。故但分三玄而遺落三要。叢林安之。不以為非。為可太息。玄沙曰。真常流注為平等法。但是以言遣言。以理逐理。謂之明前不明後。蓋分證法身之量。未有出格之句。死在句下。若知出格之

量則不被心魔所使。入到手中。便轉換落落落地。言通大道。不坐平常之見。此第一句也。古謂之句中玄。回機轉位。生殺自在。縱奪隨宜。出生入死。廣利一切。迥脫色欲愛見之境。此第二句也。古謂之意中玄。明陰洞陽。廓周沙界。一真體性。大用現前。應化無方。全用全不用。全生全不生。方便喚作慈定之門。此第三句也。古謂之體中玄。浮山遠公亦曰。意中玄。非意識之意。古不足道。遠亦迷倒。余不可以不辨。無盡領之。又曰。吾頃見謝師直稱。吳僧簡程者。有大知見。親見慈明。蓋是真點。曾。楊岐道。吾之流亞。接人多。舉汾陽十智同真。願遂聞其說。余曰。十智同真。與三玄三要。同一關捩。汾陽曰。夫說法者。須具十智同真。若不具十智同真。邪正不辨。緇素不分。不能與人天為眼目。決斷是非。如鳥飛空而折翼。如箭射的而斷弦。弦斷故射的不中。翼折故空不可飛。弦壯翼牢。空的俱徹。作麼生是十智同真。與諸上座點出。一同一質。二同大事。三總同參。四同真智。五同徧普。六同具足。七同得失。八同生殺。九同音吼。十同得入。又云。與什麼人同得入。與誰同音吼。作麼生是同生殺。什麼物同得失。阿那箇同具足。是什麼同徧普。何人同真智。孰能總同參。那箇同大事。何物同一質。有點得出底麼。點得出者。不恪慈悲。點不出者。未有參學。眼在切須辨取。要識是非面目。見在。

今此法門叢林怕怖。不欲聞其名。何以言之。諸方但愛平實。見解。執之不移。唯欲傳授。不信有悟。借使汾陽復生。親為剖析。亦以為非。昔阿難夜經行。聞童子誦佛偈曰。若人生百歲不善。水潦鶴未若生一日而得決了之。阿難就教之曰。不善諸佛機。非水潦鶴也。童子歸白其師。師笑曰。阿難老昏矣。當以我語為是。於今學者之前語。三玄十智。旨趣。何以異此。於是無盡嗟咨曰。然其旨趣。豈無方便。余作偈曰。十智同真面目全。於中一智是根源。若人欲見汾陽老。擘破三玄作兩邊。又問。四種賓主。亦臨濟建立法門乎。余曰。三世如來。諸代祖師。鍛出凡聖情見之鑪錘。非止臨濟用之。如龍山本見馬祖。洞山价禪師初遊方。與密師伯者偕行。經長沙龍山之下。見溪流菜葉。价回瞻峯巒深秀。謂密曰。箇中必有隱者。乃並溪而進。十許里。有老僧癯甚。以手加額。呼曰。此間無路。汝輩何自而至。价曰。無路且置。菴主自何而入。曰。我不曾雲水。价曰。菴主住山幾許時。曰。春秋不涉。价曰。菴主先住耶。此山先住耶。曰。不知。价曰。為什麼不知。曰。我不曾人天來。价曰。得何道理。便余住山。曰。我見泥牛闖入海。直至而今無消息。价即班密之下而拜之。問如何是主中賓。曰。青山覆白雲。又問如何是主中主。曰。長年不出戶。又問主賓相去幾何。曰。長江水上波。又問賓主相見有何言說。

曰。青風拂白月。价再拜求衣止。老僧笑曰。三間茆屋從來住。一道神光萬境閑。莫作是非來辨我。浮生穿鑿不相關。於是自焚其菴。深入層峯。其後价住山。問僧何者是汝主人。公對曰。現祇對者。价仰而咨嗟曰。此所謂馬後驢前事。奈何認以為自己乎。佛法平沉。此其兆也。客中主尚未明。况主中主哉。僧曰。如何是主中主。价曰。汝自道者。曰。道得。即是客中主。如何是主中主。价良久曰。不辭向汝道。相續也大難。余觀龍山老僧之意。如蕭何之識韓信。豈有法哉。而价公之論。如霍光之立朝。進止亦有律度。嗚呼。後生之不見古人之大全也。必矣。价亦置主中主于胷中可疑也。余嘗至臨川。與來世英遊相好。俄上藍長老至。上藍謂世英曰。覺範圍工詩耳。禪則其師猶錯。矧弟子耶。世英笑曰。師能勘驗之乎。上藍曰。諾。居一日。同游疎山。飯于逆旅。上藍以手畫按謂余曰。經軸之上。必題以字。是何義。余亦畫圓相。橫一畫曰。是此義也。上藍愕然。余為作偈曰。以字不成。八不是。法身睡著無遮閉。衲僧對面不知名。百衆人前呼不起。上藍歸。舉似世英。世英拊手曰。孰謂詩僧亦能識字義乎。因同看汾陽作犢牛偈曰。有頭無角。寔堪嗟。百劫難逃者作家。凡聖不能明得盡。現前相見有些些。余謂世英曰。此偈又余字義之訓詁也。世英問余華嚴經曰。毗目僊人執善財手。即

時善財自見其身。住十佛刹。徼塵數世界中。到十佛刹。徼塵數。諸佛所見。被佛刹。及其衆。會諸佛相好。種種莊嚴。乃至或經百千億。不可說。佛刹徼塵數劫。乃至時彼僊人。放善財童子手。即時自見其身。還在本處。此一段義。何以明之。余曰。皆象也。方執其手。即入觀法之時。見自他不隔於毫端。始終不移於當念。及其放手。即是出定之時。永明曰。是知不動本位。遠近之刹。歷然一念靡移。延促之時。宛余世尊善以蓮為譬。而世莫有知者。余特知之。夫蓮方開華時。中已有子。子中已有莖。因中有果。果中有因。三世一時也。其子分布。又會屬焉。相續不斷。十方不隔也。又問法華經曰。世尊於一切衆前。現大神力。出廣長舌相。上至梵世。極難和會。而解者曰。佛音深妙。觸處皆聞。超越聖凡。則其舌廣長。高出梵世。此說如何。余曰。此殆所謂隨語生解。非如來世尊之意。瀉山曰。凡聖情盡。體露真常。理事不二。即如如佛。而學者不能深味此語。苟認意度而已。譬如衆盲摸象。隨其所得。為是故。象偏為尾。為蹄。為要。為牙。而全象隱矣。般若經曰。無二無二分。無別無斷。故者。真常也。非凝然一物。卓然不變壞之。真常也。舌相之至梵世。其可以情求哉。唐僧玄奘至西竺。見戒賢論師。賢時已一百六歲。衆所宗向。號正法藏。奘脩敬訖。賢使坐。問從何來。對曰。從支那國來。欲學瑜伽等。

論於是賢流涕呼弟子覺賢指以謂曰我前所夢何如弟子謂熒曰和尚三年前得疾危甚如人以刀劃其腹欲不食而死夜夢男子身金色曰汝勿自厭其身汝昔作貴近多害物命當自悔責自盡何益有支那國僧來此學法已在塗矣三年當至以法惠彼彼復流通汝罪自滅我曼殊室利也故來曉汝耳和尚疾損已三年而闍黎果至前夢有徵也余涉世多艱蓋其夙障聞曼殊室利之言以法惠人則罪自滅故有撰述佛祖旨訣之意欲以惠人而自滅風障耳非有他求也

黃梅意旨

宗門統要六祖能大師因僧問黃梅意旨什麼人得師云

會佛法人得僧云和尚還得不師云我不得僧云和尚為什麼不得師云我不會佛法汾陽昭代云方知密旨難傳翠岩芝云會得即云頭不會得即三首作麼生便有出身之路徑山杲云還見祖師麼若也不見徑山與你指出蕉芭蕉芭有葉無丫忽然一陣狂風起恰似東京大相國寺裏三十六院東廊下壁角頭王和尚破袈裟畢竟如何歸堂喫茶

罔測其旨

頌古聯珠東京惟白佛國禪師熙寧

初至南師法席殆二年師歸圓寂然入師室問師道而師以平生三轉語示天下學徒得叨于左右近數見印行語錄者其間或拈或頌罔測其旨

噫。去世未三十年。謬妄者傳習若此。良可傷哉。因而成頌。知師者可同味
馬。海印信曰。主賓相見。展家風。問荅分明。箭拄鋒。伸手問君如佛手。鍊
關金鎖萬千重。徧叅知識扣玄微。偶爾相逢話道奇。我脚伸為驢脚問。
平生見處又生疑。莫恠相逢不相識。宗師須是辨來端。鄉關風月俱論
盡。却問生緣道却難。湛堂準曰。我手何似佛手。天上人間希有。直饒總
不恁麼也。似枷上著杻。我脚何似驢脚。奉為衲僧拈却。昔年有病未痊。如
今又遭毒藥。若問生緣。真俗氣。生緣斷處。墮無為。二塗不涉。如何也。八十
婆婆學畫眉。普融平曰。我手佛手。十八十九。雲散月圓。癡人夜走。我脚
驢脚。放過一着。龐老菰籬。青平木杓。人人生緣。北律南禪。道吾舞笏。華
亭撐艇。玄關將多意氣。手不執寸鍊。兵不用一騎。八蠻與四夷。太平皆
坐致。困卧桑陰。春日斜。騰騰不識今何世。上方益曰。我手何以佛手。從
來有衫無袖。有時閑向人前。不覺露出雙肘。我脚何似驢脚。寒來須要
襪著。莫教踏著泥水。和鞋一時失却。人人有箇生緣。何須盡要梁原。若
問老僧生處。荔枝香滿南園。南堂興曰。我手何似佛手。爐鞴鉗鎚鍊。箒
曾烹紫磨金軀。光射七星牛斗。我脚何似驢脚。白刃紅旗閃爍。坐斷百
戰場中。妙鬪六韜三畧。人人有箇生緣。視聽俯仰。折旋頂戴。寰中之勅。

遵從閩外威權。圓悟勤曰。我手何似佛手。隨問拈花折柳。忽然摸着地頭。未免遭他一口。我脚何似驢脚。趙州石橋畧約。忽若築起皮球。崩倒三山五岳。人人有箇生緣。蹲身無地鑽研。若也眼皮迸綻。慮他桶底別穿。龍門遠曰。佛手驢脚生緣。黃龍元無此語。直饒恁麼知之。我儂未敢輕許。奉報四海禪人。第一不得錯舉。佛心才曰。佛手驢脚生緣。落處便是乾坤。重重無限樓閣。彈指入者無門。驢脚生緣佛手。打透上頭關。挨脫却泥水布衲。直下心空及第。生緣佛手驢脚。為君一體拈却。坦然坐致太平。猛將謾誇謀畧。道場如曰。扣關豈是丈夫兒。驢脚生緣問阿誰。佛手展開無處用。太平基業各豐滋。白楊順曰。我手何似佛手。天上南辰北斗。我脚何似驢脚。往事都來忘却。人人盡有生緣。箇箇足方頂圓。大愚灘頭立處。孤月影射深灣。會不得。見還難。一曲漁歌下遠灘。正堂辨曰。我手何似佛手。黃龍鼻下無口。當時所見顛頂。至今百拙千醜。我脚何似驢脚。文殊親見無着。好箇玻璃茶盞。不要當面諱却。人人有箇生緣。從來罪過彌天。不是牽犁拽杷。便是鼎鑊油煎。張無垢曰。我手何似佛手。天下衲僧無口。縱饒撩起便行。也是鬼窟裏走。諱不得。我脚何似驢脚。又被糲膠粘着。反身直上夔率天。已自連他老鼠藥。吐不得。人人

有箇生緣。鍊圍山下幾千年。三灾燒到四禪天。者漢猶自在傍邊。殺得工夫。石菴瑤曰。我手何似佛手。堪笑紫湖養狗。撞着焦尾大蟲。性命輸他一口。我脚何似驢脚。擬議知君大錯。進前欲飲醍醐。已是遭他毒藥。人人盡有生緣。且非夷狄中原。鎮府出大蘿蔔。趙州親見南泉。佛手驢脚生緣。生緣驢脚佛手。李公醉倒街頭。元是張公喫酒。黃龍山裏老婆禪。恰似河陽新婦醜。伊庵權曰。我手何似佛手。二八恰恰十九。年尾算到年頭。家內一錢無有。我脚何似驢脚。踏着趙州畧約。驚得迦葉皺眉。文殊却打無着。人人有箇生緣。男子氣宇衝天。若是爭田競地。我即喚死如眠。佛手驢脚生緣。浩浩叢林盛傳。直饒一穿穿却。來免十萬八千。雪菴瑾曰。我手何似佛手。合掌面南看北斗。免推明月上千峯。引得寒山開笑口。我脚何似驢脚。急走歸家日落。自古長安如鏡平。無端醉倒黃番綽。人人有箇生緣。且非東土與西天。擊珊瑚樹枝枝好。撒水銀珠顆顆圓。佛手驢脚生緣。南海波斯泛鉄船。精金美玉團堆賣。畢竟何曾直一錢。橫川珙曰。佛手驢脚容易見。最難道處是生緣。黃梅不是周家子。七歲傳衣。便會禪。

永明妙旨

頌古聯珠 杭州慧日永明延壽知覺禪師
嗣國師僧問如何是永明妙旨。師曰。更添

香著曰。謝師指示。師曰。且喜沒交涉。僧禮拜。師示偈曰。欲識永明旨。門前一湖水。日照光明生。風來波浪起。象潭泳曰。門前湖水鏡容開。對面和

盤托出來。可是永明多刺語。酒濃初不在多杯。**頌明厥旨**
頌古聯珠雲居齋和尚法燈會中為知藏。一日歸。謂師曰。

有人問我西來意。答他日不東不西。藏主作麼生會。師對曰。不東不西。燈曰。與麼會又爭得。曰。道齊只恁麼。未審和尚尊意如何。燈曰。他家自有兒

孫在。師頓明厥旨。有頌曰。接物利生絕妙。外生終是不肖。他家自有兒孫。將來用得恰好。大洪恩曰。他家自有兒孫在。父祖田園都不愛。平生活

計刹那中。東頭買得西頭賣。本覺一曰。人問西來祖師意。燈公對道。不東西。他家自有兒孫在。多是隨言却自迷。**歸根得**

旨
頌古聯珠靈雲因僧問如何是歸根得旨。師曰。早是忘却。不憶塵世。授子青曰。家破人亡何所依。無心無緒話求歸。十年忘却來時路。暫

憶此時總不知。**古尊宿語錄**僧問趙州。如何是歸根得旨。州云。答你即乖。**一異齊旨**
永嘉集一異齊旨。解惑同源。人

法俱空。故號**覺即迷旨**
五燈會元玄沙備禪師曰。動便失宗。覺即迷旨。詳禪師。**頓悟**

菩薩。詳本集。

法旨

心賦頓悟法空之旨。詳門字。

漸頓經旨

大悲心呪行法實此之法。雖是智者像代宣揚。而

並是漸頓諸經之旨。以離此十更無脩證之法。

審得本旨

梁高僧傳支婁迦識所出諸經皆審得本旨。了不加飾。可

謂善宣法要弘道之士也。詳本傳。

颯馳聖旨

唐顧誠傳颯馳聖旨。雲降紫衣。詳本傳。

悟境

觀旨

佛祖統紀介然法師鄞人。受業福泉之延壽。明智居南湖從其學。遂悟境觀之旨。

執駿知宗

旨

法苑珠林說聽篇感應緣。隋京師延興寺釋曇延。於夜夢有人被白服乘於白馬。駿尾拂地而導授經旨。延手執馬駿與之請論。寤後惟

曰。此必馬鳴菩薩授我義端。執駿知其宗旨。底事可觀耳。

六微旨大論

素問篇名。黃帝問曰。嗚呼遠哉。天之道也。如迎浮雲。若視深淵。視深淵尚可測。迎浮雲莫知其

極。王冰註。深淵淨澄而澄澈。故視之可測其深淺。浮雲飄泊而合散。故迎之莫詣其邊涯。言蒼天之象。如淵可視乎鱗介。運化之道。猶雲莫測其去

留。六氣深微。其於運化當如是喻矣。林億新校正云。詳此文與疏五過

論重夫子數言謹奉天道。余聞而藏之。心私異之。不知其所謂也。願夫子

溢志盡言其事。令終不滅。久而不絕。天之道可得聞乎。運化生成之道也。

歧伯稽首再拜對曰。明乎哉。問天之道也。此因天之序。盛衰之時也。帝曰。

願聞天道六六之節。盛衰何也。六六之節。經已啓問。天師未敷其旨。故重

問之。歧伯曰。上下有位。左右有紀。上下。謂司天地之氣二也。餘左右四氣。

在歲之左右也。故少陽之右。陽明治之。陽明之右。太陽治之。太陽之右。厥

陰治之。厥陰之右。少陰治之。少陰之右。太陰治之。太陰之右。少陽治之。此

所謂氣之標。蓋南面而待之也。標。末也。聖人南面而立。以閱氣之至也。故

曰。因天之序。盛衰之時。移光定位。正立而待之。此之謂也。移光。謂日移光。

定位。謂面南觀氣。正立。立觀歲數氣之至。則氣可待之也。少陽之上。火氣

治之。中見厥陰。少陽南方火。故上見火氣治之。與厥陰合。故中見厥陰也。

陽明之上。燥氣治之。中見太陰。陽明西方金。故上燥氣治之。與大陰合。故

燥氣之下。中見太陰也。太陽之上。寒氣治之。中見少陰。太陽北方水。故上

寒氣治之。與少陰合。故寒氣之下。中見少陰也。新校正云。按六元正紀

大論云。太陽所至為寒。生中為溫。與此義同。厥陰之上。風氣治之。中見少

陽。厥陰東方木。故上風氣治之。與少陽合。故風氣之下中見少陽也。少陰之上。熱氣治之。中見太陽。少陰東南方君火。故上熱氣治之。與大陽合。故熱氣之下中見大陽也。新校正云。按六元正紀大論云。少陰所至為熱生中為寒。與此義同。太陰之上。濕氣治之。中見陽明。大陰西南方土。故上濕氣治之。與陽明合。故濕氣之下中見陽明也。所謂本也。本之下中之見也。見之下。氣之標也。本。謂元氣也。氣別為王。則文言著矣。新校正云。詳注云。文言注矣。疑誤。本標不同。氣應異象。本者應之元。標者病之始。病生形。用求之標。方施其用求之本。標本不同求之中。見法萬全。新校正云。按至真要大論云。六氣標本不同。氣有從本者。有從標本者。有不從標本者。少陽大陰從本。少陰大陽從本。從標。陽明厥陰不從標本。從乎中。故從本者化生於本。從標本者有標本之化。從中者以中氣為化。帝曰。其有至而至。有至而不至。有至而太過。何也。皆謂天之六氣也。初之氣。起於立春前十五日。餘二三四五終氣。次至而分治。六十日。餘八十七刻半。岐伯曰。至而至者。和。至而不至。來氣不及也。未至而至。來氣有餘也。時至而氣至。和平之應。此為平歲也。假令甲子歲。氣有餘。於癸亥歲未當至之期。先期而至也。乙丑歲。氣不足。於甲子歲當至之期。後時而至也。故曰來氣不及。

來氣有餘也。言初氣之至期如此。歲氣有餘。六氣之至皆先期。歲氣不及。六氣之至皆後時。先時後至。後時先至。各差十三日而應也。新校正云。按金匱要畧云。有未至而至。有至而不至。有至而不去。有至而大過。冬至之後得甲子。夜半少陽起少陰之時。陽始生。天得溫和。以未得甲子。天因溫和。此為未至而至也。以得甲子。而天未溫和。此為至而不至。以得甲子。而天大寒不解。此為至而不去。以得甲子。而天溫和。如盛夏時。此為至而大過。此亦論氣應之一端也。帝曰。至而不至。未至而至。何如。言大過不及。歲當至晚至早之時應也。岐伯曰。應則順。否則逆。逆則變生。變生則病。當期為應。愆時為否。天地之氣生化不息。無止礙也。不應有而有。應有而不有。是造化之氣失常。失常則氣變。變常則氣血紛撓而為病也。天地變而失常。則萬物皆病。帝曰。善。請言其應。岐伯曰。物生其應也。氣脉其應也。物之生榮有常時。脉之至有常期。有餘歲星。不及歲晚。皆依時至也。帝曰。善。願聞地理之應。六節氣位何如。岐伯曰。顯明之右。君火之位也。君火之右。退行一步。相火治之。日出謂之顯明。則卯地氣分。春也。自春分後六十日有奇。斗建卯正。至于巳。正君火位也。自斗建巳正。未之中。三之氣分。相火治之。所謂少陽也。君火之位。所謂少陰熱之分也。天度至此。暄淑大行。居熱

之分不行炎暑。君之德也。少陽居之為僭逆。大熱早行。疫癘廼生。陽明居之為溫涼不時。大陽居之為寒雨間熱。厥陰居之為風濕雨生羽蟲。少陰居之為天下疵疫。以其得位。君令宣行故也。大陰居之為時雨。火有二位。故以君火為六氣之始也。相火則夏至日前後各三十日也。少陽之分。火之位矣。天度至此炎熱大行。少陽居之為熱暴。至草萎河乾。炎亢濕化晚布。陽明居之為涼氣間發。大陽居之為寒氣間至。熱爭水電。厥陰居之為風熱大行。雨生羽蟲。少陰居之為大暑炎亢。大陰居之為雲雨雷電。退。謂南面視之在位之右也。一步。凡六十日又八十七刻半。餘氣同法。復行一步。土氣治之。雨之分也。即秋分前六十日而有奇。斗建未正至酉之中。四之氣也。天度至此。雲雨大行。濕蒸乃作。少陽居之為炎熱沸騰。雲雨雷電。陽明居之為清雨霧露。大陽居之為寒雨害物。厥陰居之為暴風雨摧拉。雨生倮蟲。少陰居之為寒熱氣反用。山澤浮雲。暴雨滂蒸。大陰居之為大雨霖霖。霖音淫。復行一步。金氣治之。燥之分也。即秋分後六十日而有奇。自斗建酉正至亥之中。五之氣也。天度至此。萬物皆燥。少陽居之為溫清更正。萬物乃榮。陽明居之為大涼燥疾。大陽居之為早寒。厥陰居之為涼風大行。雨生介蟲。少陰居之為秋濕。熱病時行。大陰居之為時雨沈陰復。

行一步。水氣治之。寒之分也。即冬至日前後各三十日。自斗建亥至丑之中。六之氣也。天度至此。寒氣大行。少陽居之為冬溫。蟄蟲不藏。流水不冰。陽明居之為燥寒勁切。大陽居之為大寒凝冽。厥陰居之為寒風飄揚。雨生鱗蟲。少陰居之為蟄蟲出見。流水不冰。大陰居之為凝陰寒雪。地氣濕也。復行一步。木氣治之。風之分也。即春分前六十日而有奇也。自斗建丑正至卯之中。初之氣也。天度至此。風氣乃行。天地神明號令之始也。天之使也。少陽居之為溫疫至。陽明居之為清風。霧露朦昧。大陽居之為寒風切列。霜雪水冰。厥陰居之為大風發榮。雨生毛蟲。少陰居之為熱風傷人。時氣流行。大陰居之為風雨凝陰不散。復行一步。君火治之。熱之分也。復春分始也。自斗建卯正至巳之中。二之氣也。凡此六位終統一年。六六三百六十日。六八四百八十刻。六七四十二刻。其餘半刻分而為三。約終三百六十五度也。餘奇細分。率之可也。相火之下。水氣承之。熱盛水承。條蔓柔弱。湊潤衍溢。水象可見。新校正云。按六元正紀大論云。少陽所至為火生。終為蒸溽。則水承之義可見。又云。少陽所至為標風燔燎。霜凝。亦下承之。水氣也。水位之下。土氣承之。寒甚物堅。水冰流涸。土象斯見。承下明矣。新校正云。按六元正紀大論云。大陽所至為寒雪冰雹白埃。則土氣

承之之義也。土位之下。風氣承之。疾風之後。時雨乃零。是則濕為風吹。化而為雨。新校正云。按六元正紀大論云。大陰所至為濕生。終為注雨。則土位之下。風氣承之。而為雨也。又云。大陰所至為雷霆驟注。烈風。則風承之。義也。風位之下。金氣承之。風動氣清。萬物皆燥。金承木下。其象昭然。新校正云。按六元正紀大論云。厥陰所至為風生。終為肅。則金承之義可見。又云。厥陰所至為飄怒。大涼亦金承之義。金位之下。火氣承之。鍛金生熱。則火流。金乘火之上。理無妄也。新校正云。按六元正紀大論云。陽明所至為散落溫。則火乘之義也。君火之下。陰精承之。君火之位。大熱不行。蓋為陰精制承其下也。諸以所勝之氣乘於下者。皆折其標盛。此天地造化之大體爾。新校正云。按六元正紀大論云。少陰所至為熱生。中為寒。則陰承之義可知。又云。少陰所至為大暄寒。亦其義也。又按六元正紀云。水發而雹雪。土發而飄驟。木發而毀折。金發而清明。火發而曠昧。何氣使然。曰。氣有多少。發有微甚。微者當其氣。甚者兼其下。徵其下氣。而見可知也。所謂徵其下者。即此六承氣也。帝曰。何也。岐伯曰。亢則害。承迺制。制生則化。外列盛衰。害則敗亂。生化大病。亢。過極也。物惡其極。帝曰。盛衰何如。岐伯曰。非其位則邪。當其位則正。邪則變甚。正則微。帝曰。何謂當位。岐伯

曰。木運臨卯。火運臨午。土運臨四季。金運臨酉。水運臨子。所謂歲會。氣之平也。非大過。非不及。是謂平運。主歲也。平歲之氣。物生脉應。皆必合期。無先後也。新校正云。詳木運臨卯。丁卯歲也。火運臨午。戊午歲也。土運臨四季。甲辰甲戌。己丑己未歲也。金運臨酉。乙酉歲也。水運子。丙子歲也。丙戌午己丑己未乙酉。又為太一天符。帝曰。非位何如。岐伯曰。歲不與會也。不與本辰相逢會也。帝曰。土運之歲。上見太陰。火運之歲。上見少陽。少陰少陽。皆火氣。金運之歲。上見陽明。木運之歲。上見厥陰。水運之歲。上見太陽。柰何。岐伯曰。天之與會也。天氣與運氣相逢會也。新校正云。詳土運之歲。上見大陰。己丑己未也。火運之歲。上見少陽。戊寅戊申也。上見少陰。戊子戊午也。金運之歲。上見陽明。乙卯乙酉也。木運之歲。上見厥陰。丁巳丁亥也。水運之歲。上見太陽。丙辰丙戌也。丙巳酉己未戊午乙酉。又為大一天符。按六元正紀大論云。大過而同天化者三。不及而同天化者亦三。戊子戊午。大徵上臨少陰。戊寅戊申。大徵上臨少陽。丙辰丙戌。大羽上臨太陽。如是者三。丁巳丁亥。少角上臨厥陰。乙卯乙酉。少商上臨陽明。己丑己未。少宮上臨大陰。如是者三。臨者大過不及。皆曰天符也。故天元冊曰。天符。天符歲會何如。岐伯曰。太一天符之會也。是謂三台。一者天會。

二者歲會。三者運會也。天元紀大論曰。三合為治。此之謂也。新校正云。

按大一天符之詳。其天元紀大論注中。帝曰。其貴賤何如。歧伯曰。天符為

執法。歲位為行令。太一天符為貴人。執法猶相輔。行令猶方伯。貴人猶君

主。帝曰。邪之中也。柰何。歧伯曰。中執法者。其病速而危。執法官人之繩。准

自為邪僻。故病速而危。中行令者。其病徐而持。方伯無執法之權。故無速

害病。但執持而已。中貴人者。其病暴而死。義無凌犯。故病則暴而死。帝曰。

位之易也。何如。歧伯曰。君位臣則順。臣位君則逆。逆則其病近。其害速。順

則其病遠。其害微。所謂二火也。相火居君位。是臣位居君位。故逆也。君火

居相火。是君位居臣位。君臨臣位。故順也。遠謂里遠。近謂里近也。帝曰。善。

願聞其步何如。歧伯曰。所謂步者。六十度而有奇。奇謂八十七刻又十分

刻之五也。故二十四步。積盈百刻而成日也。此言天度之餘也。夫言周天

之度者。三百六十五度四分度之一也。二十四步。正四歲也。四分度之一。

二十五刻也。四歲氣成。積已盈百刻。故成一日。度。一日也。帝曰。六氣應五

行之變。何如。歧伯曰。位有終始。氣有初中。上下不同。求之亦異也。位。地位

也。氣。天氣也。氣與位互有差移。故氣之初。天用事。氣之中。地主之。地主則

氣流于地。天用則氣騰于天。初與中皆分天步而率刻爾。初中各三十日。

餘四十三刻四分刻之三也。帝曰：求之柰何？歧伯曰：天氣始於甲，地氣始於子，子甲相合，命曰歲立。謹候其時，氣可與期。子甲相合，命曰歲立，則甲子歲也。謹候水刻早晏，則六歲悉可與期。爾帝曰：願聞其歲六氣始終早晏何如？歧伯曰：明乎哉！問也。甲子之歲，初之氣，天數始於水下一刻，常起於平明，寅初一刻，辰中之南也。新校正云：按戊辰、壬申、丙子、庚辰、甲申、戊子、壬辰、丙申、庚子、甲辰、戊申、壬子、丙辰、庚申、歲同此。所謂辰申子歲氣會同，陰陽法以是為三合，終於八十七刻半。子正之中，夜之半也。外十二刻半，入二氣之初。諸餘刻同入也。二之氣，始於八十七刻六分。子中之左也。終於七十五刻。戌之後四刻也。外二十五刻，入次三氣之初。率三之氣，始於七十六刻。亥初之一刻，終於六十二刻半。酉正之中也。外三十七刻半，差入後四之氣。始於六十二刻六分。酉中之北，終於五十刻。未後之四刻也。外五十刻，差入後五之氣。始於五十一刻。申初之一刻，終於三十七刻半。午正之中，晝之半也。外六十二刻半，差入後六之氣。始於三十七刻六分。午中之南，終於二十五刻。辰正之後四刻，外七十五刻，差入後所謂初六天之數也。天地之數，二十四氣乃大會而同。故命此曰初六。天數也。乙丑歲，初之氣，天數始於二十六刻。巳初之一刻。新校正云：按巳巳癸

酉。丁丑。辛巳。乙酉。己丑。癸巳。丁酉。辛丑。乙巳。己酉。癸丑。丁巳。辛酉。歲同。所
謂己酉丑歲氣會同也。終於一十二刻半。卯正之中二之氣。始於一十二
刻六分。卯中之南。終於水下百刻。丑後之四刻三之氣。始於一刻。又寅初
之一刻。終於八十七刻半。子正之中四之氣。始於八十七刻六分。子中正
東。終於七十五刻。戌後之四刻五之氣。始於七十六刻。亥初之一刻。終於
六十二刻半。酉正之中六之氣。始於六十二刻六分。酉中之北。終於五十
刻。未後之四刻。所謂六二。天之數也。一六為初六。二六為六二。名次也。丙
寅。歲初之氣。天數始於五十一刻。申初之一刻。新校正云。按庚午。甲戌。
戌寅。壬午。丙戌。庚寅。甲午。戊戌。壬寅。丙午。庚戌。甲寅。戊午。壬戌。歲同。此所
謂寅午戌歲氣會同。終於三十七刻半。午正之中二之氣。始於三十七刻
六分。午中之酉。終於二十五刻。辰後之四刻三之氣。始於二十六刻。巳初
之一刻。終於一十二刻半。卯正之中四之氣。始於一十二刻六分。卯中之
南。終於水下百刻。丑後之四刻五之氣。始於一刻。寅初之一刻。終於八十
七刻半。子正之中六之氣。始於八十七刻六分。子中之左。終於七十五刻。
戌後之四刻。所謂六三。天之數也。丁卯。歲初之氣。天數始於七十六刻。亥
初之一刻。新校正云。按辛未。乙亥。己卯。癸未。丁亥。辛卯。乙未。己亥。癸卯。

丁未。辛亥。乙卯。己未。癸亥歲同。此所謂卯未亥歲氣會同。終於六十二刻半。酉正之中二之氣。始於六十二刻六分。酉中之北。終於五十刻。未後之四刻三之氣。始於五十一刻。申初之一刻。終於三十七刻半。午正之中四之氣。始於三十七刻六分。午中之酉。終於二十五刻。辰後之四刻五之氣。始於二十六刻。巳初之一刻。終於一十二刻半。卯正之中六之氣。始於一十二刻六分。卯中之南。終於水下百刻。丑後之四刻。所謂六四。天之數也。次戊辰歲。初之氣。復始於一刻。常如是無已。周而復始。始自甲子年。終於癸亥歲。常以四歲為一小周。一十五周為一大周。以辰命歲。則氣可與期。帝曰。願聞其歲候何如。歧伯曰。悉乎哉。問也。日行一周。天氣始於一刻。甲子歲也。日行再周。天氣始於二十六刻。乙丑歲也。日行三周。天氣始於五十一刻。丙寅歲也。日行四周。天氣始於七十六刻。丁卯歲也。日行五周。天氣復始於一刻。戊辰歲也。餘五十五歲。循環周而復始也。所謂一紀也。法以四年為一紀。循環不已。餘三歲一會同。故有三合也。是故寅午戌歲氣會同。卯未亥歲氣會同。辰申子歲氣會同。巳酉丑歲氣會同。終而復始。陰陽法以是為三合者。緣其氣會同也。不尔則各在一方。義無由合。帝曰。願聞其用也。歧伯曰。言天者求之本。言地者求之位。言人者求之氣交。本謂

天六氣。寒。暑。燥。濕。風。火。也。三陰三陽由是生化。故云本。所謂六元者也。位。謂金。木。火。土。水。君火。也。天地之氣上下相交。人之所處也。帝曰。何謂氣交。岐伯曰。上下之位。氣交之中。人之居也。自天之下。地之上。則二氣交合之分也。人居地上。故氣交之中。人之居也。是以化生變易皆在氣交之中。故曰。天樞之上。天氣主之。天樞之下。地氣主之。氣交之分。人氣從之。萬物由之。此之謂也。天樞。當齊之兩傍也。所謂身半矣。伸臂指天。則天樞正當身之半也。三分析之。上分應天。下分應地。中分應氣交。天地之氣交合之際。所遇寒暑燥濕風火勝復之變之化。故人氣從之。萬物生化。悉由而合散也。帝曰。何謂初中。岐伯曰。初凡三十度而有奇。中氣同法。奇。謂三十日。余四十二刻。又四十分刻之三十也。初中相合。則六十日。餘八十七刻半也。以各餘四十分刻之三十。故云中氣何法也。帝曰。初中何也。岐伯曰。所以分天地也。以是知氣高下生人病生之也。帝曰。願卒聞之。岐伯曰。初者。地氣也。中者。天氣也。氣之初。天用事。天用事。則地氣上騰於大虛之內。氣之中。地氣主之。地氣主。則天氣下降於有質之中。帝曰。其升降何如。岐伯曰。氣之升降。天地之更用也。升。謂上升。降。謂下降。升極則降。降極則升。升降不已。故彰天地之更用也。帝曰。願聞其用。何如。岐伯曰。升已而降。降者謂

天降已而升。升者謂地。氣之初地氣升。氣之中天氣降。升已而降。以下彰天氣之下流。降已而升。以上表地氣之上應。天氣下降。地氣上騰。天地交合。泰之象也。易曰。天地交泰。是以天地之氣升降。常以三十日半。下上下上不已。故萬物生化無有休息。而各得其所也。天氣下降。氣流于地。地氣上升。氣騰于天。故高下相召。升降相因而變作矣。氣有勝復。故變生也。

新校正云。按六元正紀大論云。天地盈虛何如。曰。天氣不足。地氣隨之。地氣不足。天氣從之。運居其中而常先也。惡所不勝。歸所和同。隨運歸從而生其病也。故上升則天氣降而下。下勝則地氣遷而上。多少而差其分。微者小差。甚者大差。甚則位易氣交。易則大變生而病作矣。帝曰。善。寒濕相遘。燥熱相臨。風火相值。其有間乎。岐伯曰。氣有勝復。勝復之作。有德有化。有用有變。變則邪氣居之。夫撫掌成聲。沃火生沸。物之交合。象出其間。萬類交合亦由是矣。天地交合。則八風鼓析。六氣交馳於其間。故氣不能正者。反成邪氣。帝曰。何謂邪乎。邪者。不正之目也。天地勝復。則寒暑燥濕風火六氣互為邪也。岐伯曰。夫物之生。從於化。物之極。由乎變。變化之相薄。成敗之所由也。夫氣之有生化也。不見其形。不知其情。莫測其所起。莫究其所止。而萬物自生自化。近成無極。是謂天和。見其象。彰其動。震烈剛暴。

飄泊驟卒。拉堅摧殘。摺拆鼓慄。是謂邪氣。故物之生也。靜而化成。其毀也。躁而變革。是以生從於化。極由乎變。變化不息。則成敗之由常在。生有涯分者。言有終始爾。新校正云。按天元紀大論云。物生謂之化。物極謂之變。故氣有往復。用有遲速。四者之有而化而變。風之來也。天地易位。寒暑移方。水火易處。當動用時。氣之遲速往復。故不常在。雖不可究識。意端然微甚之用。而為化為變。風所由來也。人氣不勝。因而感之。故病生焉。風匪求勝於人也。**帝曰。遲速往復。風所由生。而化而變。故因盛衰之變耳。成敗倚伏遊乎中。何也。**夫倚伏者。禍福之萌也。有禍者。福之所倚也。有福者。禍之所伏也。由是故禍福互為倚伏。物盛則衰。樂極則哀。是福之極。故為禍所倚。否極之泰。未濟之濟。是禍之極。故為福所伏。然吉凶成敗。目擊道存。不可以終。自然之理。故無尤也。**歧伯曰。成敗倚伏。生乎動。動而不已。則變作矣。**動靜之理。氣有常運。其微也。為物之化。其甚也。為物之變。化流於物。故物得之以生。變行於物。故物得之以死。由是成敗倚伏。生於動之微甚。遲速爾。豈惟氣獨有是哉。人在氣中。養生之道。進退之用。當皆然也。新校正云。按至真要大論云。陰陽之氣。清靜則生化。治動則苛疾起。此之謂也。**帝曰。有期乎。歧伯曰。不生不化。靜之期也。人之期可見者二也。天地之**

期不可見也。夫二可見者。一曰。生之終也。其二曰。變易與土同體。然後捨小生化。歸於大化。以死後猶化變未已。故可見者二也。天地終極。人壽有分。長短不相及。故人見之者鮮矣。帝曰。不生化乎。言亦有不生不化者乎。歧伯曰。出入廢則神機化滅。升降息則氣立孤危。出入。謂喘息也。升降。謂化氣也。夫毛羽倮鱗介。及飛走歧行。皆生氣根於身中。以神為動靜之主。故曰神機也。然金玉土石鎔珽草木。皆生氣根於外。假氣以成立主持。故曰氣立也。五常政大論曰。根于中者命曰神機。神去則機息。根于外者命曰氣立。氣止則化絕。此之謂也。故無是四者。則神機與氣立者。生死皆絕。新校正云。按易云。本乎天者親上。本乎地者親下。周禮大宗伯。有天產地產。大司徒云。動物植物。即此神機氣立之謂也。歧音祁。故非出入。則無以生長壯老已。非升降。則無以生長收藏。夫自東自西。自南自北者。假出入息以為化主。因物以全質者。陰陽升降之氣以作生源。若非此道。則無能致是生者。也是以升降出入。無器不有。包藏生氣者。皆謂生化之器。觸物然矣。夫竅橫者。皆有出入去來之氣。竅豎者。皆有陰陽升降之氣。往復於中。何以明之。則壁牕戶牖兩面伺之。皆承來氣。衝擊於人。是則出入氣也。夫陽升則井寒。陰升則水暖。以物投井。及葉墜空中。翩翩不疾。皆

升氣所礙也。虛管溉滿。捻上懸之。水固不泄。為無升氣而不能降也。空瓶小口。頓溉不入。為氣不出而不能入水。由是觀之。升無所不降。降無所不升。無出則不入。無入則不出。夫羣品之中。皆出入升降。不失常守。而云非化者。未之有也。有失無失。有情無情。去出入。已升降。而云存者。未之有也。故曰。升降出入。無器不有。故器者。生化之宇。器散則分之。生化息矣。器謂天地及諸身也。宇。謂屋宇也。以其身形包藏府藏。受納神靈。與天地同。故皆名器也。諸身者。小生化之器宇。大虛者。廣生化之器宇也。生化之器。自有小大。無不散也。夫小大器皆生有涯。分散有遠近者也。故無不出入。無不升降。真生假立。形器者無不有此二也。化有小大。期有近遠。近者不見遠。謂遠者無涯。遠者無常見。近而嘆有其涯矣。既近遠不同期。合散殊時節。即有無交競。異見常乖。及至分散之時。則近遠同歸於一變。四者之有。而貴常守。四者。謂出入升降也。有出入升降。則為常守。有出無入。有入無出。有升無降。有降無升。則非生之氣也。若非胎息道成。居常而生。則未之有。屏出入息。泯升降氣。而能存其生化者。故貴常守。反常則災害至矣。出入升降。生化之元主。故不可無之。反常之道。則神去其室。生化微絕。非災害而何哉。故曰。無形無患。此之謂也。夫喜於遂。悅於色。畏於難。懼於禍。外

惡風寒暑濕。內繁飢飽愛欲。皆以形無所隱。故常嬰患。累於人間也。若便
想慕滋蔓。嗜欲無厭。外附權門。內豐情偽。則動以牢網。坐招燔燭。欲思釋
縛。其可得乎。是以身為患階。老子曰。吾所以有大患者。為吾有身。及吾
無身。吾有何患。此之謂也。夫身與形。與大虛釋然消散。復未知生化之氣。
為有而聚耶。為無而滅乎。帝曰。善。有不生不化乎。言人有逃陰陽。免生化
而不生不化。無始無終。同大虛自然者乎。歧伯曰。悉乎哉。問也。與道合同。
惟真人也。真人之身。隱見莫測。出入天地內外。順道至真。以生。其為小也。
入於無間。其為大也。過虛空界。不與道如一。其孰能尔乎。帝曰。善。

微旨

抱朴子余聞歸同契合者。則不言而信著。途殊別務者。雖忠告而
見疑。夫尋常咫尺之近理。人聞取舍之細事。沉浮過於金羽。皂白
分於粉墨。而抱惑之士。猶多不辨焉。豈况說之以世道之外。示之以至微
之旨。大而笑之。其來久矣。豈獨今哉。夫明之所及。雖玄陰幽夜之地。毫釐
芒髮之物。不以為難焉。苟所不逮者。雖日月麗天之昭灼。嵩岱干雲之峻
峭。猶不能察焉。黃老玄聖深識獨見。開秘文於名山。受仙經於神人。歟埃
塵以遺累。凌大遐以高躋。金石不能與之齊堅。龜鶴不足與之等壽。念有
志於將來。愍信者之無文。垂以方法。炳然著明。小脩則小得。大為則大驗。

引可以難老矣。知草木之方者。則曰唯藥餌可以無窮矣。學道之不成。就由乎偏枯之若此也。淺見之家。偶知一事。便言已足。而不識真者。雖得善方。猶更求無已。以消工棄日。而所施用。意無一定。此皆兩有所失者也。或本性戇鈍。所知殊尚淺近。便強入名山。履冒毒螫。屢被中傷。耻復求還。或為虎狼所食。或為魍魎所殺。或餓而無絕穀之方。寒而無自溫之法。死於崖谷。不亦愚哉。夫務學不如擇師。師所聞素狹。又情不盡以教之。因告云。為道不在多也。夫為道不在多。自為已有金丹至要。可不用餘耳。然此事知之者甚希。寧可虛待。不必以之大事而不脩。交之小術乎。譬猶作家云。不事用他物者。蓋謂有金銀珠玉在乎掌幄懷抱之中。足以供累世之費者耳。苟其無此。何可不廣播百穀。多儲菓蔬乎。是以斷穀辟兵。馱効鬼魅。禁禦百毒。治救衆疾。入山則使猛獸不犯。涉水則令蛟龍不害。經瘟疫不畏。遇急難則隱形。此皆小事而不可不知。况過此者。何可不聞乎。或曰。敢問欲脩長生之道。何所禁忌。抱朴子曰。禁忌之至急。在不傷不損而已。按易內戒。及赤松子經。及河圖記命符。皆云。天地有司。過之神。隨人所犯。輕重以奪其筭。筭減則人貧耗。疾病屢逢。憂患筭盡則人死。諸應奪筭者。有數百事。不可具論。又言身中有三尸。三尸之為物。雖無形。而實魄靈鬼神之

屬也。欲使人早死。此尸常作鬼。自放縱遊行。饗人祭酹。是以每到庚申之日。輒上天白司命。道人所為過失。又月晦之夜。竈神亦上天白人罪狀。大者奪紀。紀者三百日也。小者奪筭。筭者三日也。或作一日。吾亦未能審此事之有無也。然天道邈遠。鬼神難明。趙簡子。秦穆王。皆親受金策於上帝。有土地之明徵。山川草木。井竈滂池。猶皆有精氣。及人身中。况天地為物之至大者。於理當有精神。有神則宜賞善而罰惡。但其體大而網疎。不必機發而響應耳。然覽諸道戒無不云。欲求長生者。必欲積善立功。慈心於物。恕己及人。仁逮昆蟲。樂人之吉。愍人之苦。賙人之急。救人之窮。手不傷生。口不勸禍。見人之得。如己之得。見人之失。如己之失。不自貴。不自譽。不嫉妬。勝己。不佞諂。陰賊。如此。乃為有德。受福于天。所作必成。求仙可冀也。若乃憎善好殺。口是心非。背向異辭。反戾真正。害其下。欺罔其上。叛其所事。受恩不感。弄法受賂。縱曲枉直。廢公為私。刑加無辜。破人之家。收人之寶。害人之身。取人之位。侵克賢者。誅戮降伏。謗訕仙聖。傷殘道士。彈射飛鳥。剗胎破卵。春夏燎獵。罵詈神靈。教人為惡。蔽人之善。危人自安。佻人自功。壞人佳事。奪人所愛。離人骨肉。辱人求勝。取人長錢。還人短陌。決放水火。以術害人。迫脅羸弱。以惡易好。強取強求。擄掠致富。不公不平。淫佚

然而淺見之徒區區所守。甘於荼蓼而不識。紕蜜。酣於醜酪而不賞醇醪。知好生而不知有養生之道。知畏死而不信有不死之法。知飲食過度之速疾病而不能節肥甘於其口也。知極情恣欲之致枯殞而不知割懷於所欲也。余雖言神仙之可得。安能令其信乎。或人難曰。子體無參午達理。竒毛通骨。年非安期彭祖多歷之壽。目不接見神仙。耳獨不聞異說。何以知長生之可獲。養性之有徵哉。若覺玄妙於心得。運逸鑒於獨見。所未敢許也。夫衣無蔽膚之貌。資無謀夕之儲。而高談陶朱之術。自同猗頓之策。取譏論者其理必也。抱痼疾而言精和鵲之伎。屢奔北而稱究孫吳之筭。人不信者以無効也。余荅曰。夫寸鱗沉迹濫水之中。則謂天下無四海之廣也。芒蜎宛轉菓核之內。則謂八極之界盡於茲也。雖告之以無涯之浩汗。語之以宇宙之恢闊。以為空言。必不肯信也。若令吾眼有方瞳。耳長出頂。亦將控飛龍而駕慶雲。凌流電而造倒景。子又將安得而詰我。設令見我。又將呼為天神地祇異類之人。豈為我為學之所致哉。姑聊以先覺挽引同志。豈強令吾子之徒皆信之哉。若令家戶有仙人。屬目比肩。吾子雖蔽亦將不疑。但彼人之道成。則蹈青霄而遊紫極。自非通靈。莫之見聞。吾子必為無耳。世人信其臆斷。仗其短見。自非所度。事無差錯。習乎所致。怪乎

所希提耳指掌。終於不悟。其來尚矣。豈獨今哉。或曰。屢承嘉談。足以不疑於有仙矣。但更自嫌於不能為耳。敢問更有要道。可得單行者否。抱朴子曰。凡學道。當階淺以涉深。由難以及易。志誠堅果。無所不濟。疑則無功。非一事也。夫根莖不洞地。而求柯條干雲。淵源不泓。而求湯流萬里者。未之有也。是故非積善陰德。不足以感神明。非誠心欵契。不足以結師友。非功勞不足以論大試。又未遇而求要道。未可得也。凡舟金液。最是仙主。然事大費重。不可卒辨也。寶精愛炁。最其急也。并將服小藥以延年命。學近術以辟邪惡。乃可漸階精微矣。或曰。方術繁多。誠難精備。除置金丹。其餘可修。何者為善。抱朴子曰。若未得其至要之大者。則其小者不可不廣知也。蓋藉衆術之共成長生也。大而諭之。猶世主治國焉。文武禮律。無一不可也。小而諭之。猶工匠之為車馬。轅輞軸轄。莫或應虧也。所為術者。內修形神。使延年愈疾。外攘邪惡。使禍害不干。比之琴瑟。不可以子弦求五音也。方之甲冑。不可以一札待鋒刃也。何者。五音合用。不可闕。而鋒刃所集。不可少也。凡養生者。欲令多聞而體要。博見而善擇。偏修一事。不足必賴也。又患好生之徒。各仗其所長。知玄素之術者。則曰。唯房中之術可以度世矣。明吐納之道者。則曰。唯行氣可以延年矣。知屈伸之法者。則曰。唯導

傾斜。凌孤暴寡。拾遺取施。欺給誑詐。好說人私。持人短長。牽天援地。說詛求直。假借不還。換貸不償。求欲無已。憎拒忠信。不順上命。不敬所師。笑人作善。敗人苗稼。損人器物。以窮人用。以不清潔。飲飼他人。輕秤小斗。狹幅短度。以偽雜真。採取奸利。誘人取物。越井跨竈。晦歌朔哭。凡有一事。輒是一罪。隨事輕重。司命奪其筭紀。筭盡則死。但有惡心。而無惡迹者。奪筭。若惡事而損於人者。若筭紀未盡。而自死者。皆殃子孫也。諸橫奪人財物者。或計其妻子家口。以當填之。以至死喪。但不即至耳。其惡行若不足以煞其家人者。久久終遭水火劫盜。及行求遺器物。若遇縣延疾病。自營醫藥。烹牲祭祀所用之費。要當令足。以盡其所取之直也。故道家言。枉煞人者。是以兵刃而更相煞。其取非義之財。不避怨恨。譬若以漏脯救飢。鳩酒解渴。非不暫飽。而死亦及之矣。其有曾行諸惡事。後自改悔者。若曾枉煞人。則當思救濟。應死之人。以解之。若妄取人財物。則當思施與貧困。以解之。若以罪加人。則當思薦達賢人。以解之。皆一倍於所為。則可。便受吉利。轉禍為福之道也。能盡不犯之。則必延年益壽。學道速成也。夫天高而聽卑。物無不鑒。行善不怠。必得吉報。羊公積德布施。詣乎皓首。乃受天墜之金。蔡順至孝。感神應之。郭巨煞子為親。而獲鐵券之重賜。然善難為。惡事易

作。而愚人復以項橐伯牛輩。謂天地之不能辯臧否。而不知彼有外名者。未必有內行。有陽譽者。不能解陰罪。若以齋羨之生死。而疑陰陽之大氣。亦不足以致遠也。蓋上士所以密勿而僅免。凡庸所以不得其欲矣。或曰。道德未成。又未得絕跡名山。而世不同古。盜賊甚多。將何以却朝夕之患。防無妄之灾乎。抱朴子曰。常以執日。取六癸上土。以和柏葉薰草。以泥門戶。方一尺。則盜賊不來。亦可取市南門土。及歲破土。月建土。合和為人。以著朱鳥地。亦墜盜也。有急則入生地而止。無患也。天下有生地。一州有生地。一郡有生地。一縣有生地。一鄉有生地。一里有生地。一宅有生地。一房有生地。或曰。一房有生地。不亦逼乎。抱朴子曰。經云。大急之極。隱於車軾。如此一車之中。亦有生地。亦有死地。况一房子。或曰。竊聞求生之道。當知二山。不審此山。為何所在。願垂告悟。以祛其惑。抱朴子曰。有之。非華霍也。非嵩岱也。夫太元之山。難知。易求。不天不地。不沉不浮。絕險緬邈。崔嵬崎嶇。和氣網緼。神意並遊。玉井泓邃。灌溉匪休。百二十官。曹府相由。離坎列位。玄芝萬殊。絳樹特生。其寶皆殊。金玉嵯峨。醴泉出隅。還年之士。挹其清流。子能脩之。松喬可儔。此一山也。長谷之山。杳杳巍巍。玄氣飄飄。玉液霏霏。金池紫房。在乎其隈。愚人妄往。至皆死歸。有道之士。登之不衰。採服

黃精。以致天飛。此二山也。皆古賢之所秘。子精思之。或曰。願聞真人守身鍊形之術。抱朴子曰。深哉問也。夫始青之下。月與日。兩半同昇。合或一出。彼玉池入金室。大如彈丸。黃如橘。中有嘉味甘如蜜。子能得之。謹勿失。既往。不追身。將滅。純白之氣。至微密。昇于幽關。三曲折。中丹煌煌。獨無足。立之命門。形不卒。淵乎妙矣。難致詰。此先師之口訣。知之者。不畏萬鬼五兵也。或曰。聞房中之事。能盡其道者。可單行致神仙。并可以移災解罪。轉禍為福。居官高遷。商賈倍利。信乎。抱朴子曰。此皆巫書妖妄過差之言。由於好事增加潤色。至令失實。或亦姦偽造作虛妄。以欺誑世人。藏隱端緒。以求奉事。招集弟子。以規世利耳。夫陰陽之術。高可以治小疾。次可以免虛耗而已。其理自有極。安能致神仙。及却禍致福乎。人不可以陰陽不交。坐致疾患。若乃縱情恣欲。不能節宣。則伐年命。善其術者。則能却走馬。以補腦。還陰丹。以充腸。采玉液於金池。引三五於華梁。令人老有美色。終其所稟之天年。而俗人聞黃帝以千二百女昇天。便謂黃帝單以此事致長生。而不知黃帝於荆山之下。鼎湖之上。飛九丹成。乃乘龍登天也。黃帝自可有千二百女耳。而非單行之所由也。凡服藥千種。三牲之養。而不知房中之術。亦無所益也。是以古人恐人輕恣情性。故美為之說。亦不可盡信也。玄素

喻之水火。煞人而又生人。在於能用與不能耳。大都其要法。御女多多益善。如不知其道而用之。一兩人足以速死爾。彭祖之法最其要者。其他經多煩勞難行。而其為益不必如其書。人少有能為之者。口訣亦有數千言耳。不知之者。雖服百藥。猶不能得長生也。

永樂大典卷之一萬一百十六



重錄總校官侍郎臣高拱

學士臣胡正蒙

分校官侍讀臣呂旻

書寫儒士臣韓槐

圈點監生臣蔣洲

臣歐陽卿





